


# HEBREUX, KAPU YA TANU

## MPE YA SAMBANU <sup>1</sup>

 . . . ya—ya Buku ya Hébreux. Na manima beto ke baka ya 7, kinganga-Nzambi ya Melchisédek. Mpe na manima beto ke baka, katuka kinganga-Nzambi ya Melchisédek, na bilumbu ya nene ya kukatula-masumu, mpe nkabwani, luswaswanu ya bakukatula-masumu. Na manima kukota na kapu yango ya nene ya lukwikilu, kapu 11; mpe kapu 12, “Kulosa kizitu nyonso.” Mpe kapu 13, “Yinzo yango ya Kukonda nsuka yina me tungama ve na maboko ya muntu; kasi Nzambi, yandi mosi, me sala Yinzo ya nene yayi.” Mutindu ya kele ya kuyituka!

<sup>2</sup> Mu ke na kyese mingi na kumona mpangi ya kento na manima kuna, yina me kota malu-malu yayi na lukutakanu. Mu ke na kumona yandi mpe bakala ya yandi. Mazono, beto vwandaka na nzila ya beto, na kulutaka kisika yina. . . Mu vwanda banza ti mu zabaka konso mwa mwamvu mpe nsongi, na kuvwandaka mukengi-mbingu awa na Indiana, mpe bamvula mingi muntu yina ke tambulaka na kutalaka bisika. Mu zabaka konso kisika. Kasi mu zolaka zimbana mazono, kuna kisika bawu vwandaka, na zulu ya mwa myongo, na nzila ya malu-malu.

<sup>3</sup> Mpe mama yina vwandaka na cancer na mazafu, mpe Mfumu kubelusaka kento yango mbala mosi. Beto bakaka. . . Oh, mpe mutindu ya kwizaka nyonso, beto vwandaka ya kuvwanda kuna. Mpangi Roberson, yandi lenda vwanda awa, bubu yayi. Mu me mona kento ya yandi, mpe Mpangi Wood, yina kele awa. Mpe beto vwandaka kuna na kaminio ya ntama, Mpangi Roberson mpe munu, mpe Mpangi Wood. Mpe beto bakaka kaminio yayi, kwendaka kuna, na zulu ya mingo. Mpe kuna Mfumu kulakisaka mbala mosi cancer yina. Mpe kuna beto telamaka kuna mpe talaka yawu mbote kubika kento yina. Na meso ya beto mosi, beto telamaka mpe talaka yawu mbote kubika kento yina. Mpe yandi bokilaka na manima kento ya Mpangi Wood; mpe yandi vwandaka tuba na munu, ti yandi vwanda basisa na yinwa kima mosi ya ndombi. Mpe awa yandi kele na suka yayi, ya kuvwanda na manima na dibuundu, yandi mpe bakala ya yandi ya luzolo, ke na kuzwaka ntangu mosi ya mbote na Mfumu. Yandi kele ve mbote?

<sup>4</sup> Mpe mu vwanda zaba ve ti. . . Awa, na bambala mingi, samu na bantu yina kele na kizunga, ba-vision ke salamaka na mpasi mingi awa. Yayi kele yinzo ya munu. Mpe, mu zola kutuba, na dibuundu.

<sup>5</sup> Lumingu, sabala, beto. . . Bantu yikwa vwandaka awa na kumona muntu yina na fauteuil roulant? Ya kufwa meso, kikata, lendaka ve kutelama, mpe nerf ya yintu kufwa, mpe Mayo bikaka yandi. Mpe—mpe mpangi ya munu mosi ya Katolika dokotolo fidisaka yandi awa. Mpe ntete na kukwiza na lukutakanu, Mfumu pesaka vision ya muntu. Beno nyonso zaba yawu. Mpe kuna muntu yango kubelukaka, na nzila ya MUTINDU ME TUBA MFUMU. Beno me mona? Mpe na manima telamaka, tambulaka, bakaka fauteuil roulant ya yandi, vwanda lenda kumona mutindu beno lenda to mutindu munu. Mpe basikaka na kivinga na kupusaka fauteuil ya yandi, na mutindu ya mbote. Mpe nerf ya kitezo. . . Beno zaba, beno ke lenda ve kutelama beno mosi, beno me mona, beno lenda kaka ve. Mpe vwandaka bamvula na fauteuil yina.

<sup>6</sup> Mpe mazono na yina mu kumaka kuna, mama kumonaka munu na ndosi kukwiza, kaka na ngunga ya zole na manima ya midi, mpe kutuba ti yandi “vwandaka na cancer,” mpe na manima, “MUTINDU ME TUBA MFUMU, ‘yandi kuzwaka kubeluka.’” Mpe—mpe yandi vumbukaka, mpe ya vwandaka kaka kieleka ngunga ya zole na manima ya midi. Mpe Mpeve ya Mfumu kukulumukaka, mpe kuna ndosi yango—yango yina yandi kuzwaka, mpe Mfumu pesaka lutendulu. Mpe yandi kubelukaka kaka kuna na kisika yina, kaka kuna kisika beto vwandaka tala mbote. Mutindu ya kele mbote!

<sup>7</sup> Mu me zimbana nkumbu ya yandi. Yinki ya kele? Yinki kele nkumbu ya nge, mpangi ya kento? Walton, Mpangi ya kento Walton, ya kuvwanda na manima kuna. Nge zola kaka kutelama, Mpangi ya kento Walton? Mu zola kuyufula nge mutindu nge ke na kuwa. [Mpangi-kento Walton me tuba, “Ya kele kaka mbote mingi.”—Mu.] Amen. Ya kele mbote, mbote mpe mbote mingi. Yandi kele mbote mingi, samu na kusakumuna beto na mutindu yina. Na yawu beto ke na kovingila na kuzwa kitezo ya nene ya kulutila, ya kufuluka ya Nzambi.

<sup>8</sup> Dokotolo kubumbaka yandi yayi. Yandi tubaka na yandi ti “yandi vwanda pema kaka na lweka mosi.” Yina ya vwandaka, cancer kumenaka mpe vwanda zenga kupema na lweka yina ya mazafu, beno me mona. Beno lenda ve kumona cancer na nzila ya radiographie, samu ti cancer kele cellule, yawu mosi, mpe ya kele—ya kele luzingu. Mpe beno—beno—beno kaka beno—beno ke talaka kaka mbote cancer na nzila ya, na radiographie. Beno ke mona yawu ve.

<sup>9</sup> Mpe, kasi Mfumu me kieleka. . . Beto vwandaka ya kutelama kuna mpe talaka yawu mbote, beto mosi, na meso ya beto mosi. Kumonaka yawu mbote kutambula, mpe monaka yawu kukatuka, na meso ya beto mosi. Na yawu, beto me vutula mingi matondo samu na yawu.

<sup>10</sup> Mpe ntangu yayi, beno ntangu yayi sambila samu na beto, sabala yayi, na yina beto ke kwenda. Mpe Mpangi Neville mu banza ke landila kisika mu ke bika, samu na Kilumbu ya tatu na lukutakanu ya nkokila. Beno kondwa yawu ve ntangu yayi, kulandila yayi ya nene ya Buku ya Apocalypse.

<sup>11</sup> Mu zaba ti bisambu mingi me pesama, mpe beto—beto zaba ti Nzambi ke kuwaka kisambu. Kasi beto, na suka yayi, beto zola kaka kupesa kisambu ya fyoti ntete kutanga ya Buku. Ntangu yayi, muntu nyonso yina kele na lenda, lenda tanga Buku mutindu *yayi*, to lenda fungula yawu mutindu *yayi*. Kasi ya ke lomba Nzambi, yandi mosi, samu na kufungula lubakusu, samu ti Yandi kele Yandi Yina kaka lenda sala yawu.

Na yawu beto kulumusa bayintu ya beto mwa ntangu fyoti kaka.

<sup>12</sup> Ntangu yayi, Tata, na Nkumbu ya Mwana ya Nge ya luzolo, Mfumu Yesu, beto me kwiza ya kulemvuka mingi ntangu yayi na kupesa beto mosi, mutindu bisadi ya Nge, ti Nge ke zonzila na nzila ya beto. Zenga bikoba yina ke zonza mpe makutu yina ke kuwa, ti Ndinga lendaka tubama na nzila ya Nzambi mpe kuwa na nzila ya Kimpeve, na kati ya bantu. Pesa yawu, Tata. Ti Yandi baka Ndinga ya Nzambi mpe kulonga na beto kaka mutindu beto ke na nsatu, samu ti beto me lomba yawu na Nkumbu ya Yandi mpe samu na nkembo ya Yandi. Amen.

<sup>13</sup> Ntangu yayi, na kutangaka na suka yayi, beto vwanda longoka. Beto ke na kulongaka ve—ve; beto ke na kulongokaka kaka Buku yayi ya Hébreux. Bantu yikwa ke na kusepelaka na yawu? Oh, beto ke na kuzwaka ntangu mosi ya mbote mingi! Mpe ntangu yayi kaka na kulongokaka mbote, Masonuku na zulu ya Masonuku. Ya fwana. . . Biblia nyonso, ya muvimba ke vukana kintwadi. Ya kele ve na Mpova mosi na ngaanda ya kisika ya Yawu, kana Yawu kutulamaka kintwadi na Mpeve-Santu.

<sup>14</sup> Ntangu yayi, bantu me tubaka, “Biblia ke tulaka ntembe na Yawu mosi.” Mu zola kumona yawu. Mu me yufulaka, bamvula makumi zole na tanu, samu na yawu, mpe muntu ve me lakisaka yawu ntete. Biblia ke tulaka ve ntembe. Kana ya kele, ya kele ve Biblia. Yehowa ya nene, ya seko zolaka tula ntembe ve na Yandi Mosi, na yawu ya kele ve na luswaswanu na kati ya Biblia. Ya kele kaka kukondwa lubakusu ya bantu.

<sup>15</sup> Ntangu yayi samu na mwa dibanza, ntete beto landila. Ntangu yayi, Buku ya Hébreux kusonamaka na Santu Paul, samu na ba-Hébreux. Yandi sonikaka mosi na ba-Éphésien, yina vwandaka bantu ya Éphèse, Dibuundu ya Klisto; mosi na ba-Romain na Rome; mpe mosi na bantu ya Galate; mpe mosi na ba-Hébreux.

<sup>16</sup> Ntangu yayi, beto talaka ti Paul, kuvwandaka mulongisi ya Biblia, na kubanda. Ya kele yina beto longokaka. Ti yandi vwandaka na yisi ya mulongisi ya nene, mosi ya kulutila nene

ya bilumbu ya yandi, Gamaliel. Mpe yandi vwandaka na luzabu ya mingi na Ngwisani ya Ntama. Yandi zabaka yawu mbote. Kasi yandi kumaka muntu yina vwandaka talisa mpasi na nzila yina vwandaka Nzila ya Klisto, samu ti ba longaka yandi na Ngwisani ya Ntama na yisi ya milongisi. Kasi milongisi, na bunene vwandaka ya kimuntu. . . Mu banza ti mu ke na kutuba kima ya yimbi ve.

<sup>17</sup> Kasi, na bunene, kana muntu kele kaka na malongi mpe mutindu ya balukolo, ya kele na bunene yina muntu me sala. Beno me mona, ya kele ve dibanza ya kimpeve, samu ti ya me kuma malongi ya lukolo. Beto kele na yawu bubu yayi. Presbytérien, Luthérien, Pentecote, balukolo nyonso yayi kele na dibanza ya bawu, mpe bawu ke vukisa kaka Masonuku na kati ya yayi.

<sup>18</sup> Mpe ya vwandaka mutindu mosi na Ngwisani ya Ntama. Kasi, Paul, na kuvwandaka yina ba longaka mbote, mpe zabaka Masonuku na mpova. Kasi, beno me mona, Masonuku, ata mutindu mbote beno zaba Yawu, kana Mpeve me kindisa yawu ve, kuna mukanda ke kufwaka. Mpeve ke pesaka Luzingu. Beno me mona, Ya fwana kindisa, to kupesa luzingu, na nzila ya Mpeve. Kana Mpeve pesa ve moyo na Ndinga mpe sala Yawu ve kieleka samu na beno, kuna mukanda kele kaka mayela. Ya kele kisika beto kele na Miklisto mingi ya yinwa bubu yayi, to bayina ke fwanikisaka Miklisto, ya kele dibanza yango ya mayela ya Klisto.

<sup>19</sup> Na manima beto lutaka na yayi, “Mbote, yandi zolaka kuwa kima mosi; mpe beno zolaka sala kima mosi.” Mpe, oh, beto ke kota na nyonso yina, na manima ya mwa ntangu fyoti. Mosi zolaka kuboka. Ba-Méthodiste vwanda kuboka, ntete bawu kuzwa yawu. Bantu ya Pentecote zolaka zonza na bandinga, ntete bawu kuzwa yawu. Mpe, oh, bayankaka ya bawu, Bantu ya matekita, vwanda tekitaka. Yinga. Bakuluntu. . . Bawu zolaka dumuka mpe kukulumuka, babakala na lweka mosi, bakento na yankaka. Beno me mona? Bantu ya matekita. Kuna Mpeve-Santu vwanda kwiza na zulu ya bawu mpe salaka bawu kutekita. “Bawu kuzwaka Yawu.” Kasi ya kele nyonso kaka bufanatiki. Ata mosi ya yawu kele Kieleka.

<sup>20</sup> Nzambi ke zingaka na kati ya Ndinga ya Yandi. “Lukwikilu ke kwizaka na nzila ya kuwa, na kuwa Ndinga.” “Na lukwikilu ti beno me vuuka, na nzila ya lemvo.” Ya ke na nzila ya kima mosi ve, ti beno tekita, to kuzonza na bandinga, to nyonso yina lenda salama. Ya kele na ata kima mosi ve ya kusala na yawu, ata fyoti ve. Yesu tubaka, “Yandi yina ke kuwa Bandinga ya Munu mpe ke kwikila na Yandi yina me fidisa Munu, kele na Luzingu ya Kukonda nsuka. Yandi yina ke kuwa Ndinga ya Munu mpe ke kwikila,” me kindisama na yandi, “kele na Luzingu ya Kukonda nsuka.” Yawu yayi. Ata kima ya fyoti yina beno ke sala.

21 Ntangu yayi, mu ke na kutelemina ve kutekita, to kuzonza na bandinga, to kutekita, oh, na—na kuboka. Ya kele nyonso ya kulunga. Ya kele mbote. Kasi yina kele kaka binama. Beno me mona? Mu lenda pesa beno pomme yina ba me buka na yinti, mpe beno ke vwanda kaka ve na yinti. Beno me mona? Beno. . . Ya kele binama.

22 Kuvuna, kuyiba, kunwa, kunwa tabaka, kubula bansaka ya mbongo, kusala pité, ya kele ve disumu, kasi binama ya kukondwa lukwikilu. Beno me mona? Ya kele yina beno—beno. . . Beno ke salaka yawu samu ti beno kele musumuki. Beno me mona? Kasi na ntete beno kele musumuki. Ya kele yina ke sala beno kusala yawu, samu ti beno ke kwikilaka ve. Mpe kana beno ke kwikila, kuna beno ke sala yawu ve. Kuna beno ke vwanda na zola, kyese, ngemba, mvibudulu, bumbote, lutondo, lembami, kukanga-ntima. Beno tala mbuma ya Mpeve-Santu. Beno me mona?

23 Na yawu beto kele na mwa bima, mwa bakuningana ya nzutu, ya kele samu ti muntu me katukila nzila ya ntama, yina ba me bula ya Ndinga. Ya kele Ndinga. “Lukwikilu ke kwizaka na nzila ya kuwa.”

24 Na yawu ntangu Paul. . . Nzambi soolaka Paul. Bantu soolaka Matthias. Ntangu yandi. . . Bawu bulaka dzeke, kasi yandi salaka ata kima mosi ve. Ya ke lakisa ngolo yina kele na dibuundu kuna, samu na kusala nsodolo, samu na kusoola badiakre ya bawu, mpe kufidisa milongi ya bawu na bisika. Ya kele kimuntu, na bambala mingi.

25 Ti muntu kwenda kisika Nzambi ke twadisa yandi na kukwenda. Mu zola yawu. Kana bantu na lukutakanu tuba kaka, “Mbote, awa kele dibuundu ya mbote. Mpangi ya bakala yayi me tungisa dibuundu ya kitoko. Mpe beto me kuzwa mwa ya beto ya luzolo.” Bawu ke fidisa yandi na dibuundu yayi. Bawu ke bakula ve ti bawu ke na kufwa bawu mosi. Beno me mona? Na kisika ya ntete, kana muntu yina kwenda kuna, yandi ke lenda ve na kufulusa kisika ya muntu yina. Kuna bawu ke lembisa kaka dibuundu yina, samu na kumeka na kulakisa luzolo mingi na yina ba me zola yina. Ya ke vwandaka kaka mutindu yina ntangu nyonso.

26 Kasi mu ke kwikilaka na lutumu ya nene ya dibuundu mosi na mosi. Yinga. Beno bika konso dibuundu kuvwanda yawu mosi, na kusoola ba-pasteur ya yawu, badiakre ya yawu, ya yawu, nyonso yina ya kele. Mpe kuna, mutindu yina, muntu yina kele kuna kele na ata évêque na zulu ya yandi. Kana Mpeve-Santu zola kuzonza kima mosi na dibuundu yina, bawu fwana yufula ve na muntu kana bawu lenda sala yayi to kusala yina. Ya kele muntu yandi mosi na Mpeve-Santu. Beno lakisa munu na nzila ya Biblia yinki kele nene mingi, na kati ya Biblia, kuluta kuluntu ya dibuundu mosi na mosi na dibuundu mosi

na mosi? Ya kele kieleka, yinga, tata, kimfumu ya dibuundu mosi na mosi, konso dibuundu na yawu mosi. Ntangu yayi, bumpangi, ya kele mbote mingi. Mabuundu nyonso fwana vwanda na bumpangi mutindu yina, kintwadi. Kasi kimfumu ya dibuundumosi na mosi!

<sup>27</sup> Beno tala Paul, na kuvwandaka mfumu mulongisi ya nene, yina longokaka mbote, na nzila ya yandi na Damas, kilumbu mosi, samu na kukangisa bantu yina vwandaka na Nzila ya malu-malu yayi. Ntangu yayi, yandi vwandaka ya kusungama. Nzambi ke fundisaka beno ve na nzila ya kusungama ya beno. Mu me monaka ntete ve bantu ya kulutila kusungama kulutila mimpani. Mingi mpe ya bawu ke fwaka bana ya bawu mosi, ya mpamba, samu—samu na munkayulu na kiteki. Ya kele ve kusungama. Muntu lenda baka phénol, na kieleka, na kubanzaka ti yandi vwandaka baka kima yankaka. Kusungama ke vuukisaka ve. “Ya kele na nzila yina ke monana mbote na muntu, kasi nsuka na yawu kele banzila ya lufwa.”

Paul vwandaka ya kusungama ntangu yandi ndimaka, na lutumu ya yandi mosi, kulosa matadi na Étienne. Na ntwala ya bamvula, mu ke zolaka kulomba lemvo ya Paul, yandi tubaka, “Mu kele ya kulunga ve ti ba bokila munu kilandi to ba bokila munu ntumwa, samu ti mu me talisa Dibuundu mpasi tii na lufwa.” Ya kusungama!

<sup>28</sup> Mpe na nzila ya yandi kuna, yandi kuzwaka kimbangi mosi. Mpeve-Santu kutalanaka na Dikunzi ya nene ya Tiya, mpe Yawu kufwaka yandi meso. Ntangu yayi, beto talaka yawu, Dikunzi yango ya Tiya vwandaka Klisto. Mpe Yandi kele Dikunzi mosi ya Tiya yina twadisaka bana na ntoto ya kuyuma. Klisto vwandaka Nzambi, mpe Nzambi vwandaka Klisto. Nzambi kumaka muntu mpe zingaka na kati ya nzutu ya Mfumu Yesu. “Nzambi vwandaka na kati ya Klisto, na kuvutula ngwisani yinza na Yandi mosi,” na kulakisaka yina Yandi vwandaka.

<sup>29</sup> Awa na Biblia na manima, na banzila me luta beto vwandaka tanga, ti, “Yandi salaka Yandi mosi yisi mingi kuluta Bawanzio. Yandi bakaka nzutu, ve ya Bawanzio, kasi bakaka nzutu ya muntu.” Bawanzio me kubwaka ve, bawu ke na nsatu ya ata mpulusu. Nzutu kubwaka, bantu, mpe bawu vwandaka na nsatu ya mpulusu. Na yawu, na misiku ya ntama, na kuvwanda mukudi, na ntete yandi zolaka vwanda muntu ya dikanda; Buku ya nene ya Ruth, beto talaka yawu awa, mwa ntangu me luta. Mpe mutindu ti Nzambi, na kuvwandaka Mpeve, kukumaka muntu ya beto ya dikanda, na kukumaka mosi ya beto, samu na kukuula beto mpe kupesa beto Luzingu ya Seko. Yandi zolaka kuma beto, ti beto na nzila ya lemvo lendaka kuma mutindu Yandi.

<sup>30</sup> Mpe beto talaka Dikunzi ya Tiya kutwadisaka bana ya Israël. Mpe ntangu Yawu kumaka nzutu awa na zulu ya ntoto, beto

kuwaka Yandi kutuba kilumbu mosi, mpe Yandi tubaka ti Yandi vwandaka Dikunzi ya Tiya. Bawu tubaka, “Nge ke tuba ti nge kele ya kulutila nene na tata ya beto Abraham?”

<sup>31</sup> Yandi tubaka, “Ntete Abraham kuvwanda, MU KELE.” Nani vwandaka MU KELE? Dikunzi ya Tiya na divunda ya tiya, kubambuka moyo ya ntangu nyonso na nzila ya konso nsungi; ve kaka nsungi yina, kasi nsungi yayi mpe, Dikunzi mosi ya Tiya. Mpe beto ke na kuvutula matondo na suka yayi ti beto kele mpe na foto ya Yawu, ti Yandi me soba ve. Yandi kele Yandi Yina lenda ve kufwa, ya Seko, ya kusakumuna. Yandi ke na kusalaka mutindu mosi ya bima ntangu yayi yina Yandi salaka kuna, mpe wapi mutindu ya kyese ya ke sala beto kuwa.

<sup>32</sup> Kasi ntete Paul kundima nzingulu yayi. . . Na kuzabaka ti Wanzio ya Mfumu vwandaka Dikunzi ya Tiya, yina vwandaka Klisto, . . . Mbote, Yandi vwandaka Wanzio ya ngwisani, yina vwandaka Klisto. Moïse kuyindulaka mbote, ti, kusoolaka na kisika na kutala bampasi na bantu ya Klisto, mpe kuvwanda ya kutwadisa na Klisto, kulutila bimvwama ya Égypte. Yandi landaka Klisto, yina vwandaka na nzutu ya Dikunzi ya Tiya.

<sup>33</sup> Na yina Klisto tubaka, “Mu me katuka na Nzambi,” ntangu Yandi vwandaka awa na zulu ya ntoto, “Mu ke vutuka na Nzambi.” Na manima ya lufwa ya Yandi, na luzikulu, na mvumbukulu, nzutu ya kukembisa vwandaka na diboko ya Kimfumu, samu na kusala lombilu; Paul kumonaka Yandi mutindu Dikunzi ya Tiya, dyaka: Nsemo yina, zolaka kufwa yandi meso; bulaka yandi na bumpofo.

<sup>34</sup> Pierre kumonaka Yandi kukota na boloko mutindu Nsemo, mpe fungulaka myelo na ntwala ya yandi na ntangu yandi vwandaka basika. Beto talaka ti Yandi vwandaka Alpha mpe Omega, ya Ntete mpe ya Nsuka.

<sup>35</sup> Mpe awa Yandi kele na beto, bubu yayi, ke na kusalaka mutindu mosi kaka ya bima yina Yandi salaka kuna, na kutalanaka dyaka Yandi mosi na beto, na kulakisaka yawu na yinza ya science.

<sup>36</sup> Oh, na ngunga yayi ya nene ya mpimpa mpe ya poto-poto na zulu ya ntoto, beto zolaka vwanda bantu ya kyese mingi na yinza ya muvimba, na kusepelaka, na yina beto zaba. Ntangu nyonso yina, ntangu bantu kele ya kundimisa na malongi, mpe mitindu nyonso ya ba-isme mpe bima na ntoto, mpe dyaka, bubu yayi, Nzambi ya kieleka, ya moyo, na nzila ya Ndinga ya Yandi mpe na nzila ya nzikisa ya Yandi ya ke monana, ke lakisa beto ti Yandi kele awa na beto, na kusalaka, na kutambulaka, na kuzingaka, na kusalaka kaka kieleka mutindu Yandi ke salaka ntangu nyonso. Wapi mutindu ya bantu ti beto kele, na kuzwa yayi! Beto fwana. . . Biblia ke tuba, kuna, na kapu ya 2, “Beto fwana kangama na bima yayi. Samu ti, wapi mutindu beto ke kima, kana beto mona mpamba mpulusu ya mfunu yina?”

<sup>37</sup> Ntangu yayi, beto me kwiza na kumona, ntete Paul zolaka ndima nzingulu yina . . . Ntangu yayi, beto ke na kukotisa mbote. Ntangu yayi, ata mutindu ya kimbangi yina beno me kuzwaka, dibuundu, mu zola kuyufula beno kima mosi. Ata mutindu mbote ya ke talana, mutindu kieleka ya ke monana, ya fwana vwanda ya kuteza na nzila ya Biblia. Ntangu nyonso na Ndinga! Beno bika Yawu ata mbala mosi ve, samu na mutindu mosi ya kimbangi.

<sup>38</sup> Mpe Paul, ntete yandi kundima yawu, yandi kwendaka na Arabie, mpe vwandaka kuna bamvula tatu, na kutezaka kimbangi yayi na Ndinga. Mpe ntangu yandi vutukaka, yandi zabaka mbote-mbote. Kima ve zolaka lembisa yandi, samu ti yandi vwandaka ya kukangama na zulu ya Ndinga, ya kukangama ngwi. Mpe awa kele kisika yandi ke na balukaka ntagu yayi samu na kulakisa na ba-Hébreux, bima yango ya nene yina ba tubilaka, na Ngwisani ya Ntama, kumonisamaka na Yesu Klisto. Wapi mutindu ya nkembo!

<sup>39</sup> Ntangu yayi, Lumingu me luta, to Kilumbu ya tatu me luta, Mpangi Neville na kati awa, na kapu ya 5, simbaka mwa bisika mosi ya zulu, samu ti ya kele kapu ya kitoko. Mpe beto monaka yandi kubaka kapu ya 4, Lumingu me luta, na zulu ya *Saba*, kuzitisa ya Saba. Beno me zaba mbote-mbote, na suka yayi, beno me zaba yinki kuzitisa ya Saba kele? Kana beno zaba, beno tuba, “Amen.” [Dibuundu me tuba, “Amen.”—Mu.]

<sup>40</sup> *Saba* kele “Kupema” yina beto ke kotaka, na nzila ya kilumbu ve, na nzila ya musiku ve, kasi na kukotaka na kati ya Klisto yina kele Saba ya beto. Yandi kele Saba ya beto. Beto me tala yawu nzila nyonso na Ngwisani ya Ntama, mpe me lakisa ti ntangu ke kwiza ntangu Ndinga ke vwanda “nzila na zulu ya nzila, musiku na zulu ya musiku.” Mpe Yandi monisaka ti beto kotaka na Kupema ya Yandi na Kilumbu ya Pentecote, “Samu ti yayi zolaka sala ya kulemba kupema, kusukisa.”

<sup>41</sup> Beto talaka, ti, “Nzambi zengaka kilumbu na David, na kilumbu ya sambwadi.” Mpe, “Nzambi kupemaka na ya sambwadi.” Yandi pesaka yawu na bana ya Israël na ntoto ya kuyuma. “Mpe dyaka, Yandi zengaka kilumbu.” Wapi kilumbu ya vwandaka? Kilumbu mosi na kati ya sabala? “Kilumbu ntangu beno ke kuwa Ndinga ya Yandi, beno kanga ve ntima ya beno.” Ya kele kilumbu Yandi ke kota, samu na kupesa beno ngemba ya Seko, Saba ya Seko.

<sup>42</sup> Beno ke kwendaka ve na dibuundu na Lumingu, samu na kukuma musambidi, kuna. Ntangu beno ke butuka na Mpeve ya Nzambi, beno ke kota na Kupema ya ntangu nyonso, ata dyaka kuzitisa ya saba. Beno kele *na kati* ya Saba, na kulandilaka, ntangu nyonso, mpe tii Seko. “Bisalu ya beno ya yinza me manisa,” me tuba Biblia, “mpe beno me kota na kati ya ngemba yayi ya kusakumuna.”



43 Bakapu tanu ya ntete yayi ke na kutulaka Yesu na kisika mutindu Nganga-Nzambi ya Ntete. “Nzambi na bantangu mingi mpe na mitindu mingi zonzaka na batata na nzila ya baprofete, kasi na kilumbu ya nsuka yayi na nzila ya Mwana ya Yandi, Yesu,” kapu ya 1te, nzila ya 1te.

44 Me landila mutindu yina tii na nsuka ya kapu ya 5, beto monaka Yandi kutalisama mutindu Melchisédek, yandi yina kuzwaka ve mbandukulu ya bilumbu, kukondwa nsuka ya luzingu ya yandi, kasi Nganga-Nzambi na kulandilaka kukondwa nsuka. Beno banza na yawu. Nani vwandaka Muntu ya nene yayi? Beto ke kota na yawu, na pene ya bakapu zole kubwela, Beto ke longoka, luzingu ya Yandi ya muvimba: Muntu ya nene yayi yina kutanaka Abraham, yina kuzwaka ata mbala mosi ve papa mosi, kuzwaka ata mbala mosi ve mama mosi, Yandi kuzwaka ata mbala mosi ve ntangu mosi ti Yandi bandaka luzingu, to ata mbala mosi ve ti Yandi ke kuzwa ntangu ti Yandi ke suka luzingu. Mpe Yandi kutanaka na Abraham yina katukaka na muzingu yina yandi nungaka ntinu.

45 Beno tala Muntu ya nene yayi, Nyonso yina Yandi vwandaka, kele dyaka moyo. Yandi kuzwaka ve nsuka ya luzingu. Ya vwandaka Klisto, yandi kutanaka. Beto ke kota na kati ya kulongoka ya yawu, na bilumbu fyoti.

46 Ntangu yayi, beto zola kubanda awa na kapu ya 5 ntangu yayi, kaka samu na dibanza ya fyoti ntete beto baka ya 6, samu ti ya kele kieleka kima ya mutindu yankaka. Beno tala mbote. Beto ke banda na nzila ya 7 ya kapu yayi. Mbote, beto banda na nzila ya 6.

*Mutindu mpe yandi tubaka na kisika yankaka, Nge kele nganga-Nzambi ya seko na mutindu ya Melchisédek.*

*Yandi yina na bilumbu ya yandi na nzutu, ntangu yandi. . . salaka bisambu mpe bakubondila na kubokaka na ngolo. . . na mansanga na. . . vwandaka yandi vwandaka na lenda ya kuvuukisa yandi na lufwa, mpe kuzwaka mvutu samu ti yandi kutumamaka;*

*Ata ti yandi vwandaka Mwana, kasi yandi longokaka. . . kutumama na nzila ya mambu yina yandi talaka mpasi;*

47 Ntangu yayi awa kele kisika mu zola kukuma, na nzila yayi ya 9. Beno kuwa. Mu banza ti Mpangi Neville kumaka na yawu, na Kilumbu ya tatu. Mu vwandaka ve awa. Mbote, beno kuwa.

*Mpe na kukumaka ya kulunga, yandi me kuma mfumu ya mpulusu ya seko na bayina nyonso ke tumamaka na yandi;*

*Nzambi tulaka yandi nganga-Nzambi ya ntete na mutindu ya Melchisédek.*

*Na yina beto kele na mingi ya kutuba, . . .*

<sup>48</sup> Beto ke bika yawu kuna na yawu, samu ti beto ke baka Melchisédek na mwa bankokila.

<sup>49</sup> Ntangu yayi beto ke banda na yayi, na kulongoka ya beto ya konso ntangu. Mu zola ti . . . Mu ke tanga kaka yina me bikana ya yayi na mwa ntangu fyoti, nzila ya 11.

*Na yina beto kele na mingi ya kutuba, . . . mambu ya ngolo ya kubangula, samu ti beno ke na kubakula dyaka ve na nswalu.*

*Beno bayina katuka ntama zolaka vwanda milongisi, beno kele dyaka na nsatu ti ba longa beno bandongosolo ya ntete ya mambu ya Nzambi; mpe me kuma na nsatu ya kunwa miliki, na kisika ngombe ya ngolo ve.*

*Samu ti muntu nyonso yina ke kunwaka miliki kele na kimbangi ve na ndinga ya ludedomo: samu ti yandi kele mwana ya fyoti.*

Oh, mu banza ti Mpeve-Santu ke na kukulumusaka kaka yawu na kati ya beno ntangu yayi.

*Samu ti yandi yina—yina ke kunwaka miliki kele na kimbangi ve na ndinga ya ludedomo: samu ti yandi kele bébé.*

<sup>50</sup> Kana beno pesa bébé ngombe ya ngolo, beno ke kufwa yandi. Ya kele samu na yina bantu mingi ke tubaka, “Ah, mu—mu ke kwikilaka yina ve,” mpe ke kwenda. Dyaka ba-bébé! Bawu lenda kaka ve kubakula. Bawu lenda ve kuzaba Kieleka yina. Yawu—Yawu ke kufwa bawu. Bima ya nene, ya ngolo dibuundu zolaka zaba bubu yayi, kasi beno lenda longa Yawu ve. Bawu—bawu—bawu—bawu ke tutana dibaku na Yawu. Bawu zaba ve yinki ya kusala na Yawu.

<sup>51</sup> Paul, na kuzonzaka na nkonga ya ba-Hébreux yayi . . . Dyaka, na bantu ya mayela mingi ti yandi wandaka tubila awa, na bantu ya mayela mingi, bayina longokaka mingi. Beto ke mona yawu, na mwa—mwa bantangu fyoti, bantu ya mayela mingi. Kasi Dinsweki ya kati ya kimpeve, dibuundu kele dyaka ya kufwa meso na Yawu. Yandi tubaka, “Na yina beno zolaka longa bayankaka, beno kele dyaka bana ya fyoti.”

<sup>52</sup> Oh, mu zaba ti ya kele na mingi ke telamaka mpe ke kwendaka mpe ke tubaka, “Oh, mu ke na nsatu ve ya kukwenda na dibuundu dyaka. Nkembo na Nzambi, Mpeve-Santu me kwiza, Yandi kele mulongisi.” Ntangu beno ke kuzwa dibanza yina, beno kele kaka na foti. Samu na yinki Mpeve-Santu tulaka milongisi na Dibundu, kana Yandi zolaka vwanda Mulongisi? Beno me mona? Na ntete ya kele na bantumwa, baprofete, milongisi, ba-evangeliste, mpe ba-pasteur. Mpeve-Santu tulaka milongisi na Dibundu, samu ti Yandi longu na nzila ya mulongisi yina. Mpe kana ya—ya kele ve landila Ndinga,

ti Nzambi ke siamisa yawu ve, kuna ya kele ve mutindu ya kulunga ya malongi. Ya fwana fwanakana na Biblia ya muvimba, mpe kuvwanda kaka moyo bubu yayi mutindu Yawu vwandaka kuna. Ya kele kima ya kieleka yina me monisama.

<sup>53</sup> Ntangu yayi beno tala.

*Kasi ngombe ya ngolo kele samu na bayina kele . . . ya kukula, mpe samu na bayina balufundusu me salama . . . sadila na nzila ya kusala ya bambakusulu ya bawu na kuswasikisa mbote mpe yimbi.*

Kuzaba yina kele mbote mpe yina kele yimbi, na nzila ya kuswasikisa mabanza.

<sup>54</sup> Ntangu yayi beno tala, beto ke banda ntangu yayi leso ya beto. Na dibanza ya nene yayi ntangu yayi, beto kwenda na nzila ya 1te.

*Na yawu beto bika malongi ya ntete ya Klisto, . . .*

Yinki yandi ke na kutubaka? Bakapu nyonso tanu ya ntete yayi me vwanda na zulu ya Klisto, samu na kulakisa Nani Yandi kele. Ntangu yayi beto ke na kubika malongi yango ya ntete ya Klisto.

<sup>55</sup> Yinki beto me tala Yandi kuvwanda? Beto me mona Yandi kuvwanda Yehowa ya Nene yina Nzambi kulakisaka na nzutu. Beto monaka Yandi ku—kuvwanda ve profete, kasi muvimba ya Kinzambi na nzutu. Yandi vwandaka Jéhovah yina kumaka nzutu. Mpe nzutu, Yesu, fukaka kaka Yandi. Nzambi na kuzingaka na kati ya muntu. Nzambi vutulaka ngwisani na muntu, na nzila ya muntu, na nzila ya lubutuku ya bumwense ya Mwana ya Yandi Mosi. Mpe Yehowa, Mpeve, kuzingaka na kati ya Yandi.

<sup>56</sup> Ntangu yayi, bantu yikwa ke bambuka moyo na malongi ya Kinzambi, mutindu beto vutukaka mpe monaka Nzambi mutindu mukyama na mutindu nyonso ya Mpeve, mutindu Yandi vwandaka? Mpe na manima Logos kubasikaka na Nzambi, ya kumaka théophanie, mpe ya vwandaka na nzutu ya muntu. Mpe Moïse kumonaka Yandi kuluta, na dibulu ya ditadi. Mpe na manima théophanie yango kumaka kieleka nzutu ya muntu, Klisto.

Mpe mutindu beto monaka ti beto, na nzila ya lemvo ya Yandi, ke na Luzingu ya Kukonda nsuka. Ntangu yayi, mpova *ntangu nyonso* kele “samu na kitamina mosi; samu na kati-kati ya ntangu mosi.” Ya kele ya kutuba, na Biblia, “Kukondwa nsuka *mpe* kukondwa nsuka,” kuvukisa ya bampova. Kasi *ntangu nyonso* zola kaka kutuba “ntangu mosi.” Kasi Seko zola kutuba kukonda nsuka. Mpe kaka bima yina kuzwaka mbandukulu kele na nsuka, kasi bima yina kuzwaka ve mbandukulu kele na nsuka ve. Na yawu Nzambi kuzwaka ata mbandukulu ve mpe Yandi kele na ata nsuka ve.

<sup>57</sup> Mpe kuna, na yawu, Melchisédek, Nganga-Nzambi ya nene, mutindu muntu, Yandi kuzwaka ata mbandukulu ve mpe Yandi kele na ata nsuka ve. Mpe ntangu beto, na nzila ya théophanie yango, ti, ba salaka beto na kizizi ya Nzambi ntete ba sala yinza; ntangu théophanie yango kumaka nzutu mpe zingaka na kati-kati ya beto, kuna, na nzila ya lufwa ya Yandi, beto beto mosi kuzwaka Mpeve ya Yandi mpe beto kele na ata nsuka ve; Luzingu ya Kukonda nsuka; Bawanzio ve, kasi babakala mpe bakento. Oh, mu. . . Na mutindu nyonso, kana mu lendaka kaka kunata yawu na mutindu ti bantu ya munu—ya munu kubakula yawu! Beno ke vwanda ata mbala mosi ve Wanzio. Nzambi salaka Bawanzio, kasi Nzambi salaka muntu. Mpe yina Nzambi ke salaka kele ya Nzambi, ya kele Kukonda nsuka mutindu Nzambi kele. Mpe muntu kele kaka Seko mutindu Kiyidiki ya yandi, samu ti ba salaka yandi na Seko.

<sup>58</sup> Kasi disumu ke suka, mpasi ke suka. Na yawu, ya lenda vwanda ve na difelo ya Seko. Ya kele na difelo, tiya mpe soufre, beto zaba yawu, kasi ya kele ve na difelo ya Seko. Ya kele kaka na mutindu mosi ya Luzingu ya Kukonda nsuka mpe ya kele na Nzambi. Kana beno ke mona mpasi kukonda nsuka, beno kele na Luzingu ya Kukonda nsuka. Difelo ke suka, ya lendaka vwanda byazi ya bamvula, kasi na nsuka ya ke suka.

<sup>59</sup> Biblia ke tuba ve, kisika, ti bawu talaka na Seko mpasi, ya ke tuba, “Kukonda nsuka mpe kukonda nsuka.” Jonas banzaka ti yandi vwandaka na kivumu ya baleine “kukonda nsuka,” mpe. *Ntangu nyonso* kele kitamina mosi to ntangu yina ba me zenga. Kasi *Seko* kele ya kukonda nsuka, ya kele ata na mbandukulu to nsuka ve. Ya kele mutindu baki, selekele. Mpe na yina ntangu ya beto ke na kukwenda na ntwala, beto ke na kubaluka kaka na bamitifi ya nene ya Nzambi.

<sup>60</sup> Mitifi ya Nzambi vwandaka kusala muntu na kizizi ya Yandi, samu na kubundana na Yandi. Mpe Yandi salaka yandi moyo yina ba lendaka simba. Ntangu yayi, disumu kotisaka beto na kisika ya—ya—ya kubodisa, kasi yina ata mbala mosi ve kangaka ndandani ya Nzambi. Mpe, nkundi nsumuki, bubu yayi, kana beno me butama ya malu-malu ve na Mpeve ya Nzambi, beno ke suka kisika mosi. Mpe nsuka ya beno kele poto-poto, na kubeba, mpe kutala mpasi mpe mpasi. Kasi samu na beno yina me kwikila na Mfumu Yesu, mpe me ndima Yandi mutindu Mvulusi ya beno mosi, ya kele kaka Seko mutindu Nzambi kele Seko. Beno kele na ata nsuka ve, “Mu ke pesa na bawu *Zoe* ya Kukonda nsuka, Luzingu ya yandi mosi Nzambi, mpe bawu ke kufwa ata mbala mosi ve to mpe ke kwiza na lusambusu, kasi me luta lufwa na Luzingu.” Ya kele yina Yandi vwandaka. Ya kele samu na yina Yandi kwizaka.

<sup>61</sup> Ntangu yayi, Yesu, na nkwezulu ya Yandi, ya kinganga-Nzambi ya Yandi, kwizaka kaka ve samu na lukanu ya kumona mawa. Bantu mingi ke longaka yawu mutindu yina, ti Yandi

kwizaka, na kutubaka, “Mbote, kana Mu lendaka tala mpasi, Mu ke sala mawa na kumona mpe bantu kieleka ke kwiza na Munu.” Ya kele foti. Ya kele ve na Masonuku samu na yawu.

Samu ti, bantu nyonso yina ke vuuka kilumbu, Nzambi zabaka bawu ntete kwandi yinza kusalama. Biblia ke tuba yawu. Nzambi zola ve awa, ti muntu kufwa. Yandi zola ti bawu nyonso kukwiza na kubalula ntima. Kasi, na kuvwandaka Nzambi, na nzila ya luzabu Yandi zabaka yawu.

<sup>62</sup> Beno tala na Romains, kapu ya 8. Paul vwanda simbisa kuna, na kutubaka na yina me tala nsodolo ya Nzambi, ti, “Ésaü mpe Jacob, ntete ti mosi to yankaka ya bana kubutuka, to kima mosi, Nzambi tubaka ti Yandi zabaka bawu mpe ti Yandi yinaka Ésaü mpe zolaka Jacob,” ntete ti mosi to yankaka ya bana kuzwa—kuzwa siansi ya kuvutula matondo ya bawu, samu ti Yandi vwandaka Nzambi. Yandi zaba. . . Yandi kele ya seko. Kana Yandi kele ya seko, Yandi zabaka konso sidi, konso nzinzi, konso kitutu, nyonso yina ke vwanda na zulu ya ntoto, Yandi zabaka yawu. Yandi kele ya kukondwa nsuka, ya Seko, yina lenda kufwa ve, Nzambi ya kusakumuna, ya ngolo nyonso, yina kele bisika nyonso, yina zaba nyonso. Ya kele ve na kima yina Yandi zaba ve. Ya kele samu na yina Yandi lenda tuba yinki nsuka ke vwanda. Yandi zabaka nsuka katuka mbandukulu.

<sup>63</sup> Yina kele profesi kele kaka luzabu ya Yandi. Yandi kele mfumu muzonzi. Yandi—Yandi kele Yandi kele Zuzi. Mpe Yandi ke zonza kaka na nzonzi mwa ndwenga ya Yandi. Mpe ya kele yina profesi kele, yina lenda tuba yawu na ntwala, samu ti Yandi zaba yina ke vwanda. Ntangu yayi, ya kele Nzambi yina beto ke sadilaka. Ve nzambi ya disolo, mutindu ve ba-Bouddiste mpe ba-Mahométan, mpe nyonso yankaka yina. Kasi, Nzambi yina kele bisika nyonso, kaka awa ntangu yayi, na suka yayi, na kati ya tabernacle yayi ntangu kaka yayi; Jéhovah ya Nene, MU KELE, Yandi yina salaka Yandi mosi na lembami, samu na kubaka nzutu ya nsuni ya disumu. Awa Yandi kele. Ya kele Yandi yina kuulaka beno. Ya lenda vwanda ve na yankaka, kisika mosi, na ata ntangu ve lenda sala yawu.

<sup>64</sup> Nzambi vwandaka ve na bantu tatu kuna na zulu, mpe ti fidisaka mosi ya bawu, Mwana ya Yandi. Ya vwandaka Nzambi, Yandi mosi, yina kwizaka na kati ya nzutu ya Mwana. Mwana me kuzwa mbandukulu, mpe Mwana kuzwaka mbandukulu. Na yina, na bayankaka ya beno bantu ya Katolika ya luzolo, mu kele na buku ya beno, *Bakieleka Ya Lukwikilu Ya Beto*, yina ke tuba na, “Bumwana ya Seko ya Nzambi.” Wapi mutindu beno ke tuba dyambu yina? Wapi mutindu beno ke sala yawu kuzwa lutendulu? Wapi mutindu ya lenda vwanda Seko? Ya kele ve Biblia. Ya kele buku ya beno, “bumwana ya Seko.” Bawu ve. . . Dyambu yina kele ya kulunga ve. Samu ti, nyonso yina kele mwana kuzwaka mbandukulu, mpe Seko kele na ata mbandukulu ve, na yawu ya kele ve na bumwana ya Seko. Klisto

kumaka nzutu mpe zingaka na kati-kati ya beto. Yandi kuzwaka mbandukulu. Ya vwandaka ve na bumwana ya Seko. Ya kele Kinzambi ya Seko, bumwana ve. Ntangu yayi, Yandi kwizaka samu na kukuula beto, mpe Yandi kuulaka beto.

<sup>65</sup> Ntangu yayi, Paul, na kukotaka kuna, yina mu zaba mbote—mbote ti na nzila ya baleso me luta beno me bakula yawu. Beto ke baka dyaka yawu, ntangu mosi, kana Mfumu zola, kaka nzila na manima ya nzila. Ntangu yayi.

*Na yawu na kuzwaka . . . beto bika malongi ya ntete ya Klisto, ti beto kwenda na ya kulunga; . . .*

<sup>66</sup> Yina ke tutisa bawu dibaku, mutindu yina ve? Ti beto sala yinki?

*. . . ti beto kwenda na ya kulunga; na kukatulaka dyaka ve balufulu . . .*

<sup>67</sup> Beno tala mbote yayi. Beto baka mpova yayi “kulunga.” Beno zaba ti ya kele kaka na mutindu mosi ya kutelama na Ntwala ya Nzambi? Ya kele, na kulunga. Nzambi lenda ndima ve bima yina kele santu ve.

<sup>68</sup> Mpe beno bantu ya misiku: wapi mutindu beno lenda kuma ya kulunga na beno mosi, na yina beno kele ve na kima mosi yina ke sala beno mosi kulunga? Beno kubutamaka na kati ya disumu. Kusala ya beno ya kieleka vwandaka na kati ya disumu. Nsatu ya kieleka ya beno na kuvwanda awa vwandaka disumu. “Ya kubutama na kati ya disumu, ya kusala na kati ya disumu ya nko, kwizaka na yinza na kuzonzaka baluvunu.” Ntangu yayi wapi kisika beno ke telama?

<sup>69</sup> Wapi kisika beno kele, musumuki, yina—yina ke tubaka, “Mu ke bika kunwa tabaka. Mu ke kwenda na Mazulu?” Wapi kisika beno kele, Muklisto ya nkumbu, madidi ve tiya ve, mukebi, yina ke kwendaka bisika awa na kizizi yinda mpe ke tuba, ti, “mbote, mu kele ya dibuundu”? Beno musumuki. Ya kele kieleka. Kana ti nge kele ya kubutama na Mpeve ya Nzambi, nge kele ya kuzimbana. Ya kele kieleka.

<sup>70</sup> Wapi mutindu beno ke kwenda na Mazulu? Beno ke tuba, “Mu me vunaka ntete ve na luzingu ya munu.” “Oh, cheri. Ya—ya vwandaka kaka Wanzio, na kubanda.” Ya kele luvunu. Mu ke kipe ve mutindu mbote beno kele; beno kele nsumuki. Mpe beno kele na kima mosi ve; ya kele na ata nganga-Nzambi ve, ata évêque ve, ata cardinal ve, ata pape ve, to kima yankaka yina lenda vuukisa beno, samu ti yandi mpe kele na bwatu mosi yina beno kele na kati. Beto ke kota na kati ya yawu na baminuti fyoti. Yandi kele kaka na kitezo mosi. Yandi vwandaka . . . pape ya Rome kubutamaka na kati ya disumu, ba salaka yandi na kati ya disumu ya nkú, kwizaka na yinza na kutubaka baluvunu, kubutamaka na nzila ya kuvukana ya bakala mpe kento. Wapi kisika beno ke kuzwa kulunga na ngaanda ya yina?

71 “Mbote, papa mpe mama ya yandi kubutamaka mutindu mosi, mpe bawu kubutamaka mutindu mosi, mpe nkooko ya yandi ya kento mpe nkooko ya bakala mpe nyonso na manima.” Ya kele disumu, na kubanda!

72 Na yawu nani lenda tuba ti *yayi* kele ya santu mpe *yina* kele ya santu? Ya kele kaka na kima mosi, ya kele Yesu Klisto, Mwana ya Nzambi ya moyo, Yandi yina kumaka ya Kulunga. Mpe yina ba me lomba beto kele kuvwanda ya kulunga. Ntangu yayi, wapi mutindu beto ke vwnada yawu? Beno meka yawu, beno mosi. Mu ke zola ve kumeka kukwenda na Mazulu landila mangolo mutindu, “Mu me butama baminuti tanu me luta, mpe mbala mosi kaka ke bika yinza.” Mu ke vwanda ya kuzimbana. Kana mu me kuzwaka ntete ve dibanza ya yimbi na luzingu ya munu, kana mu me tubaka ntete ve dyambu ya yimbi na luzingu ya munu, kana mu me talaka ntete ve na kima mosi ya yimbi, me banzaka ntete ve na kima mosi ya yimbi, to ata kima mosi ve, mu kele kaka mutindu mpamba mpe ndombi mutindu bibaka ya mvindu ya difelo. Mu kele nsumuki.

73 Mu lenda kwiza na luzingu mpe kuvwanda ya kukangama na kati ya kivinga, mpe mutindu bayankaka ba-soeur Carmelite to kima, mpe kumona ata mbala mosi ve yinza, kuvwanda na kati kuna mpe kusambila luzingu nyonso, kusala mbote, ya kubutama ya mbongo mingi mpe kupesa nyonso yina kele na munu na bamputu, mpe dyaka mu kele musumuki mpe ke kwenda na difelo. Yinga, tata.

74 Mu lendaka kota na dibuundu ya ba-Lutherien, ya ba-Baptsite, ya Pentecote, ya ba-Presbytérien, na yina nkumbu ya munu kele na kati ya buku, mpe kuzinga ya kukwikama na dibuundu yango tii bamvula nkama, mpe ti luzingu ya munu ba me baka, mpe ti ata muntu ve lenda lakisa musapi ya bawu na munu mpe kutuba “Yandi me kuzwaka ntete ve dibanza ya yimbi,” mu ke kwenda na difelo kaka kieleka mutindu mu kele ya kutelama.

75 Mu kele musumuki. Ya kele kieleka. Mu ke na kima mosi ve. Ata mutindu kele ve, ata fyoti ve, mu lendaka kuzwa ntalu mosi—mosi samu na kufuta. Nzambi ke lomba lufwa. Mpe kana mu pesa luzingu ya munu mosi, kana mu pesa luzingu ya munu, kuna wapi mutindu mu lenda balula ntima? Samu ti, beno. . . Ba fwana futa ntete, mfuka. Mpe Nzambi vwandaka Yandi yina kaka zolaka pesa luzingu ya Yandi mpe kubaka dyaka Yawu. Na yawu Yandi zolaka kuma disumu, mpe kupesa Luzingu ya Yandi mpe kubaka dyaka Yawu, mpe kubokila yawu, “ludedomo,” mpe mfuka me futama. Beno bawu yayi.

76 Ntangu yayi beto luta na Matthieu, pene ya kapu ya 8, mu banza ya kele, kapu ya 7 to ya 8. Beto ke mona yinki Yesu ke tuba awa. Mbote mingi. Ya kele Matthieu, kapu ya 5. Mpe. . . Yesu, ke na kulonga, ke na kulongaka na bakyese, na nzila ya 47.

*Mpe kana beno ke pesaka kaka mbote na bankundi ya beno, yinki beno ke salaka ya ngitukulu? Mimpani ke salaka ve . . . ? (Beno tala mbote.)*

*Kasi na yawu beno vwanda ya kulunga, . . . (Yinki?)*

*Na yawu beno vwanda ya kulunga, mutindu Tata ya beno yina kele na mazulu kele ya kulunga.*

Yina vwandaka lutumu ya Yesu, “Beno vwanda mutindu yina.”

<sup>77</sup> Bawu ke tubaka, “Muntu ve lenda vwanda ya kulunga, Biblia ke tuba, ‘Ya kele na ata mosi ve ya kulunga.’ Beno tala luswaswanu ya beno.” Ya kele? Mbote mingi.

<sup>78</sup> Beno lenda vwanda ve ya kulunga na beno mosi. Kana beno ke na kusalaka kivuvu na yina beno me salaka, beno kele ya kuzimbana. “Na yawu beno vwanda ya kulunga, kaka ya kulunga mutindu Nzambi kele ya kulunga.” Ntangu yayi:

*Na yawu beno vwanda ya kulunga, mutindu Tata ya beno . . . na mazulu kele ya kulunga.*

<sup>79</sup> “Na yawu . . .” Ntangu yayi kapu ya 5, kapu ya 6 ya Hébreux.

*Na yawu beto bika malongi ya ntete ya Klisto, ti beto kwenda na ya kulunga; . . .*

<sup>80</sup> Ntangu yayi, beno, Branham Tabernacle. Oh, mu zaba, “Beto kele na bakubeluka ya nzutu.” Ya kele mbote mingi. “Beto kele na ba-vision.” Oh, ya kele—ya kele mbote. Mpe beno kele na bandosi ya kimpeve, mpe bantangu yankaka ya kele ve bandosi ya kimpeve. Mpe—mpe bantangu yankaka beno. . . “Beto, beto ke mekaka na kusadisa bamputu. Beto ke salaka yina beto lenda.” Oh, nyonso yina kele mbote, kasi ya kele ve yina beto ke na kutubilaka ntangu yayi. Beto ke na kukotaka na kitezo yankaka.

*. . . bika . . . malongi . . .*

<sup>81</sup> “Oh, yinga, beto kele na malongi ya Klisto. Beto ke kwikila ti Yandi vwandaka Mwana ya Nzambi, ya kele lubutuku ya bumwense. Beto ke kwikila yawu, na bima nyonso yayi.” Ya kele kaka mbote mingi.

<sup>82</sup> Kasi, “Beto bika yawu, beto kwenda na ya kulunga.” Oh, la la! Mu zola kuzwa ndinga ya wanzio ya ntete ntangu yayi, samu na kunata yayi na kisika beno lenda mona yawu. Ntangu yayi yandi ke tuba, “Beto bika malongi nyonso ya Klisto,” ba-théologien nyonso, mpe théologie nyonso yina beto zaba, nyonso yina me tala Bunzambi ya Klisto, mutindu Yandi kumaka Nzambi na nzutu, bima nyonso yayi yankaka.

<sup>83</sup> Paul ke landila na kubangula yawu nyonso awa, kaka na mwa baminuti fyoti. Beto tanga kaka yawu, kaka mwa fyoti, ntete beto kota na yawu.



*. . . na kutulaka dyaka ve balufulu ya kubalula ntima  
ya bisalu ya kufwa . . .*

Ntangu yayi, beto ke kwikilaka yawu.

*. . . mpe ya lukwikilu na Nzambi,*

Beto ke kwikilaka yawu.

*Mpe ya malongi ya bambotika, . . .*

Kaka mutindu beno fwana vwanda ya kubotika, beto ke kwikilaka yawu.

*. . . mpe ya kutentika maboko, . . .*

Beto ke kwikilaka na kutentika maboko, mutindu yina ve? Beno me mona, nyonso yina, kieleka.

*. . . mpe ya mvumbukulu ya bantu ya kufwa, . . .*

<sup>84</sup> Beto ke kwikilaka yawu. Ntangu yayi beno tala mbote. Beno me mona awa, “Lusambusu,” ba me sadila na, “Seko.” Ya kele kukonda nsuka. Ntangu lusambusu me tubama na Nzambi, ya kele kukondwa nsuka. Na yina, ya lenda vwanda dyaka ve na kuvutula kuvutula ngwisani na manima lusambusu me luta. Ntangu yayi beno lenda bakula samu na yinki Nzambi zolaka baka ya Yandi Mosi—ya Yandi Mosi, mutindu beto ke bokilaka yawu, nkisi ya Yandi Mosi. Ntangu Yandi fundisaka muntu na kusumukaka, mutindu kaka Yandi zolaka vutula ngwisani, vwandaka kubaka kisika ya muntu Yandi mosi. Yina kele kaka mutindu yandi zolaka vutuka na ngwisani, to zolaka vutula beto na ngwisani, ya vwandaka kubaka kisika ya beto mpe kukuma nsumuki. Nzambi, Yehowa, kumaka nsumuki, mpe Yandi pesaka luzingu ya Yandi.

<sup>85</sup> Ntangu yayi, beno lenda pesa luzingu ya beno, mutindu nsumuki, samu na kufwa samu na dyambu. Paul tubaka, “Ata ti mu pesa nzutu ya munu samu ba kuyoka yawu na tiya mutindu munkayulu, mu kele kaka kima mosi ve,” samu ti lenda simba ve. Beno me mona, ntangu beno ke kufwa, beno me kwenda. Kana beno me kufwa mutindu musumuki, beno kele ya zimbana.

<sup>86</sup> “Kasi Nzambi kulumukaka na nzutu, mpe fundisaka disumu na nzutu, na kukumaka nzutu ya disumu.” Samu ti, Yandi vwandaka Nzambi ya Seko, mpe vumbulaka nzutu ya Yandi Mosi, na yawu Yandi kele Munungisi.

<sup>87</sup> Ntangu yayi, bima nyonso yayi, “Beto kwenda na ya kulunga,” tubaka Paul. Ntangu yayi yinki?

*. . . ya lusambusu ya kukonda nsuka.*

*. . . yayi kele yina beto ke sala, . . . Nzambi pesa muswa.*

(nzila ya 3.)

<sup>88</sup> Ntangu yayi, “Beni kwenda na ntwala na ya kulunga.” Yesu tubaka, “Na yawu beno vwanda ya kulunga, mutindu Tata ya beno na Mazulu kele ya kulunga.”

Mpe beto kele, mosi na mosi, ya kufundisa. Ata nyonso yina beto me sala, beto kele ya kufundisa. Beto kubutamaka, ya kufundisa. Mama mpe papa ya beno vwandaka ya kubutama, ya kufundisa. Baya beno, bankooko ya beno nyonso vwandaka ya kubutama na kati ya disumu, ya kusala na kati ya disumu ya nko. Na yawu wapi mutindu beno ke kuzwa yawu? Wapi mutindu beno ke vwanda ya kulunga? Kana beno me salaka ntete kima mosi ve, me yibaka ntete ve, me vunaka ntete ve, me salaka ntete ve kima mosi na luzingu ya beno, beno kele dyaka ya kufundisa. Beno vwandaka ya kufundisa ntete beno pema kupema ya beno ya ntete. Beno vwandaka ya kufundisa. Ya kele kieleka. Mpe beno vwandaka ya kusambisa na Nzambi ntete beno pema kupema ya beno ya ntete. Samu ti beno vwandaka ya kusambisa, na nzila ya kuvukisa banzutu ya tata mpe mama ya beno nani, na nzila ya kusala ya bawu, nataka beno awa na zulu ya ntoto. Mpe Nzambi fundisaka yawu, na mbandukulu. Beno kele ya kufundisa, na kubanda. Kuna kisika beno . . . Mpe muntu nyonso yankaka na zulu ya ntoto vwandaka ya kufundisa na beno. Ntangu yayi wapi kisika beno ke kuzwa kulunga?

<sup>89</sup> Beno tala mbote. Beto luta kaka mwa ntangu fyoti na Hébreux, kapu ya 10. Beno kuwa mbote. Mu zola kutanga ntete, mwa fyoti na kapu ya 9, na nzila ya 11.

*Kasi Klisto kwizaka mutindu nganga-Nzambi ya ntete ya bima ya mbote yina ke kwiza, na kulutaka tabernacle ya nene mingi mpe ya kulutila kulunga, tabernacle ya Yandi Mosi, nzutu ya Yandi, . . .*

<sup>90</sup> Beno me mona, tabernacle ya ntama . . . Beno talaka? Tabernacle ya ntama vwandaka na vwale na kati ya yawu, yina vwandaka bumba sanduku kisika Nzambi vwandaka zinga. Bantu yikwa zaba yawu? Kieleka. Mbote, tabernacle ya ntama yina ya kusala na muntu awa, balele ya nela yina vwandaka ya kusala na bampusu ya bankombo ya kutenta, mpe nyonso yankaka yina, vwandaka ya kusala samu na kubumba Mvwandulu ya Nzambi. Bantu yikwa zaba ti kaka muntu mosi zolaka kota kuna mbala mosi na mvula? Kieleka. Ya vwandaka Aaron, yina vwanda kota mbala mosi na mvula. Mpe yandi zolaka vwanda ya kukusa. Mpe—mpe, oh, yina ba lombaka! Mpe yandi zolaka vwanda na tiya na diboko ya yandi; mpe kana yandi kwendaka kukondwa yawu, yandi zola kufwa na yina yandi zolaka fungula vwale yina. Yandi zola kubwa kufwa. Yandi zolaka kota kuna mpe kunamisa minda yayi, mpe kumwangisa maza na kiti ya kyadi yina vwandaka tuba, menga ya lufwa, yina vwandaka kuna mutindu kima, tii Klisto zolaka kwiza samu na kulungisa yawu.

<sup>91</sup> Ntangu yayi, kasi, Nzambi kuna kumaka na mutindu yankaka ya tabernacle. Mpe tabernacle yango vwandaka Nani? Yesu. Mpe Nzambi vwandaka na kati ya Yesu, mpe Yandi vwandaka ya kubumbama, kasi Yandi vwandaka vutula yinza

na kuvutula ngwisani na Yandi mosi, na nzila ya bakutalana ya Yandi. Klisto kulakisaka Nzambi. Yandi tubaka, “Ya kele Munu ve yina ke salaka bisalu. Ya kele Tata ya Munu yina ke zingaka na kati ya Munu. Mu ke salaka kima ve na Munu mosi kasi yina Mu ke monaka Tata kusala. Tata na kati ya Munu, ke lakisa Munu ba-vision yayi, mpe na manima mu ke kwenda sala kaka yina Tata me tuba na Munu na kusala.” Beno ke bakula yawu? Nzambi vwandaka na kati ya nzutu ya muntu, na manima ya bampusu ya bankombo ya kutenta ve, kasi vwandaka zinga, vwandaka tambula. Nzambi vwandaka na maboko; Nzambi vwandaka na makulu; Nzambi vwandaka na ludima; Nzambi vwandaka na meso; mpe ya vwandaka Klisto. Kuna Yandi vwandaka.

<sup>92</sup> Na manima, Yandi kwendaka, mpe Mpeve kwizaka na kati ya yawu, samu ti na nzila ya lufwa ya Yandi Yandi lenda kukumisa Dibuundu ya kulunga mpe kunata Dibuundu na kutumama. Mpe na manima Mpeve mosi yina vwandaka na kati ya Klisto kele na kati ya Dibuundu, ke na kusalaka mutindu mosi ya bima Klisto salaka. “Na mwa ntangu fyoti mpe yinza ke mona dyaka Munu ve; kasi beno ke mona Munu, samu ti Mu ke vwanda na beno, mpe na kati ya beno, tii nsuka ya yinza.”

<sup>93</sup> Ntangu yayi beno kuwa yayi.

*Kasi Klisto kukumaka nganga-Nzambi ya ntete ya bima ya mbote yina ke kwiza, na kulutaka tabernacle ya nene mingi mpe ya kulutila kulunga, ya kusala na maboko ve, yina zola kutuba, ya kivinga yayi ve;*

Yandi vwandaka ve ya kusala na maboko. Wapi mutindu Yandi kubutamaka? Na lubutuku ya bumwense.

*Na nzila ya menga ya bankombo mpe bangombe ve, ti nzutu yayi vwandaka ya kuvakula to vwandaka ya kusantisa, kasi na nzila ya menga ya yandi mosi. . .*

<sup>94</sup> Beno zaba ti menga ke katukaka na bakala. Mpe kuna muntu tubaka, “Oh, Yesu vwandaka Juif.” Yandi vwandaka ve Juif. “Oh, beto kele ya kuvulusa na nzila ya menga ya Juif.” Ve, beto kele ve. Kana beto vwandaka ya kuvulusa na nzila ya menga ya Juif, beto kele dyaka ya kuzimbana.

Yesu vwandaka ve Juif, to dyaka ve vwandaka Yandi Muntu ya makanda. Yandi vwandaka Nzambi: Nzambi Tata, Mpeve, Yandi yina ba ke monaka ve. “Muntu ve me monaka ntete Nzambi, kasi kaka yina basikaka na Tata me lakisa Yandi.” Yandi lakisaka Nzambi, yina Nzambi vwandaka.

<sup>95</sup> Ntangu yayi Dibuundu ya Yandi fwana lakisa Nzambi, kulakisa yina Nzambi kele. Beno me mona?

Yinki beto ke salaka? Ke bongisa beto mosi, mpe, “Mu kele na kima ve ya kusala na *bawu*. Bawu kele ba-Méthodiste. Bawu kele ba-Presbytérien. Mu kele na kima mosi ve ya kusala na

*bawu*. Mu kele Baptiste. Mu kele Pentecotiste.” Huh! Beno kele ya kuzimbana, na mutindu yina ya bamitifi. Kieleka.

<sup>96</sup> Nani lenda kukikumisa? Nani lenda tuba kima mosi? Beno tala nsoni ba-Presbhytérien me nata. Beno tala nsoni, na ba-Baptiste. Beno tala nsoni, na Katolika. Beno tala nsoni, na bantu ya Pentecote, na ba-Nazaréen, na ba-Pèlerins ya Sainteté. Beno tala bayankaka ya bawu.

Kasi, mu ke telemina beno na kulakisa diboko mosi, na nsoni, na Yawu. Yinga. Beno lakisa musapi mosi, na yina Nzambi ya Ngolo nyonso tubaka, “Yayi kele Mwana ya Munu ya luzolo na kati ya yandi yina Mu me sepela na kuzinga. Beno kuwa Yandi.” Kuna Yandi kele. Yandi kele Yandi yina kele ya kulunga.

<sup>97</sup> Ntangu yayi, beto tanga dyaka mwa ntama awa ntangu yayi.

*Na nzila ya menga ya bankombo . . . bangombe ve, kasi na nzila ya menga ya yandi mosi yandi kotaka mbala mosi na kisika ya santu, samu na kuzwa mpulusu ya kukonda nsuka . . . (Beno me bakula yawu?) . . . mpulusu ya kukonda nsuka samu na beto.*

<sup>98</sup> Ve samu na kuvwanda ya kukuula bubu yayi, mpe na manima, na sabala ke landa ntangu lukutakanu ya reveil ke banda, kuvwanda dyaka ya kukuula, mpe na manima, oh, beto ke vutuka manima mpe kuvuuka dyaka. Beno kele ya kuvuuka mbala mosi, samu na ntangu nyonso. Ya kele kieleka. Dyambu ya kukuula, kukuula, kukuula kele dyaka ve. “Mpulusu ya Seko!” “Yandi yina ke kuwa Bandinga ya Munu mpe ke kwikila na Yandi yina fidisaka Munu, kele na Luzingu ya Kukonda nsuka, mpe ke kwiza ata mbala mosi ve na lusambusu, kasi me,” na ntangu yina me luta, “lutaka lufwa na Luzingu.” Samu ti yandi me tekita? Samu ti yandi kuzwaka mbotika mutindu mosi? Samu ti yandi kuzwaka menga na diboko ya yandi? “Samu ti yandi me kwikila na Mwana kaka yina basikaka na Nzambi.” Ya kele mutindu beto ke kuzwa mpulusu ya Kukonda nsuka.

<sup>99</sup> Beno kuwa ntangu yayi.

*Samu ti . . . menga ya bankombo mpe ya bangombe, mpe bombi ya bangombe ya kento yina ba . . . mwangisaka—mwangisa na bantu ya kuvedila ve, vwandaka santisa mpe vwandaka vedisa nzutu:*

*Wapi mutindu ya kulutila ke vwanda menga ya Klisto, yina na nzila ya Mpeve ya seko kumipesaka yandi mosi kukondwa ditona na Nzambi, vedisaka ntima ya beto na bisalu ya kufwa samu na kusadila Nzambi ya moyo?*

<sup>100</sup> “Me lutaka lufwa na Luzingu.” Yinki ya lenda sala beno yina yinza ke banza? Yinki ya ke sala beno yina mfinangani ya beno ke banza? Ntima ya beto me kufwa, mpe beto me vutuka ya malu-malu mpe me butaka ya malu-malu na nzila ya Mpeve

ya Nzambi, samu na kusadila Nzambi ya kieleka mpe ya moyo. Beno bawu yayi.

101 Ntangu yayi beno luta na nzila ya 10, na kapu ya 10, na kisika, kaka na lweka yankaka ya page.

*. . . musiku na kuvwandaka kivudi ya bima ya mbote yina ke kwiza, mpe ve kifwani ya kieleka ya bima, lendaka ve na minkayulu yango yina bawu vwanda pesaka mvula na mvula kulandila na kusala yina vwandaka kwenda ya k-u-l-u-n-g-a.*

K-u-l-u-n-g-a, ya kele kuna, “Kulunga.”

*. . . beto bika malongi ya ntete ya Klisto, ti beto kwenda na ya kulunga; . . .*

*Na yawu beno vwanda ya kulunga, mutindu Tata ya beno . . . na mazulu kele ya kulunga.*

102 “Musiku na kuvwandaka kinsinsya ya bima ya mbote yina ke kwiza,” balutumu mpe bambotika mpe. . . bima nyonso yankaka yina vwandaka na bawu, “zolaka sala ata mbala mosi ve musambidi ya kulunga.” Mpe, dyaka, Nzambi ke lomba “kulunga.”

103 Kukuma muntu ya dibuundu ya ba-Nazaréen, ke sala beno ata mbala mosi ve ya kulunga. Kukuma muntu ya dibuundu ya ba-Baptiste, ya Pentecote, nyonso yina ya kele, ya ke sala beno ata mbala mosi ve ya kulunga. Kuvwanda muntu ya mbote, ya kukwikama, ke sala beno ata mbala mosi ve ya kulunga. Beno lenda ve kuzwa kima mosi. Ya kele ve na kima na beno, yina ke sala beno kuzwa. Beno kele ya kuzimbana. Beno ke tuba, “Mbote, mu ke zitisaka musiku. Mu ke zitisaka saba. Mu ke zitisaka yayi, balutumu nyonso ya Nzambi. Mu ke salaka yayi.”

104 Paul tubaka, “Ti beto bika na lweka bima nyonso yango ntangu yayi.”

105 “Nyonso yina kele mbote, kasi beto ke sala yayi. Beto ke botika bantu, mpe beto ke tentika bawu maboko samu na kubeluka ya bawu mpe nyonso yina.”

106 Beto lenda baka yawu, nzila na manima ya nzila, mosi na mosi ya bima yango. Mbotika, beto ke kwikilaka yawu. “Ya kele na kivuvu mosi, Mfumu mosi, Lukwikilu mosi, Mbotika mosi.” Beto ke kwikilaka ti ya kele na mbotika. Beto ke kwikilaka na mvumbukulu ya bantu ya kufwa. Kieleka. Beto ke kwikilaka ti Yesu kufwaka mpe vumbukaka dyaka. Beto ke kwikilaka yawu. “Kutentika ya maboko, samu na bambevo,” ya kele yina yawu ke tubaka. “Bidimbu yayi ke landa bayina ke kwikila. Kana bawu tentika maboko ya bawu na bambevo, bawu ke beluka.” Beto ke kwikilaka yawu.

Kasi yinki ya kele? Paul tubaka, “Ya kele nyonso bisalu ya kufwa.” Ya kele kima yina beno ke salaka.

107 “Ntangu yayi ti beto kwenda na ya kulunga.” Oh, la la! Beto ke na kukota na Tabernacle, na lufulu ve; Tabernacle, Tabernacle Yawu mosi. Yina kele lufulu: musiku, mpe kusungama, mpe—mpe—mpe—mpe kukota na dibuundu, mpe kuvwanda mbotika, mpe—mpe kutentika ya maboko. Nyonso yina kele balutumumu ya dibuundu.

“Kasi ntangu yayi ti beto kota na ya kulunga.” Mpe ya kele kaka na Mosi yina kele ya kulunga, ya kele Yesu.

108 Wapi mutindu beto ke kota na kati ya Yandi? “Na nzila ya ba-Méthodiste?” Ve. “Pentecote?” Ve. “Baptiste?” Ve. “Na nzila ya dibuundu mosi?” Ve. “Katolika ya Rome?” Ve.

109 Wapi mutindu beto ke kota na kati ya Yawu? Romains 8:1.

*Na yawu ya kele dyaka ve na kitumbu samu na bayina kele kati ya Klisto. . . bayina ke tambulaka ve landila ya bima ya yinza yayi, nzutu, kasi landila bima ya Kimpeve, bayina ke kipe ve yina yinza ke tuba.*

110 Ata ti beno kele ya kubela, dokotolo me tuba, “Beno ke kufwa,” beno kipe ve yawu, beno kumikwamisa fyoti ve.

111 Kana ba tuba na beno, “Beno fwana kukuma Katolika ntete beno vulusa, to Presbytérien, to fwana sala yayi,” beno kipe yawu ve.

“Na yawu kitumbu kele dyaka ve samu na bayina kele na kati ya Klisto Yesu, bayina ke tambulaka ve landila nzutu, bima yina bawu ke mona.” Nyonso yina beno ke mona na meso ya beno kele ya ntoto.

112 Kasi ya kele bima beno ke mona na mpeve ya beno, na nzila ya Ndinga! Ndinga kele maneti ya kutala ya Nzambi yina ke lakisa yina Yandi kele mpe yina beno kele. Alleluia! Oh, la la! Yawu ke tuba na beno. Yayi kele Buku kaka na yinza yina ke tuba na beno kisika beno me katuka, nani beno kele, mpe kisika beno ke na kukwendaka. Beno lakisa munu page mosi ya kutanga, kisika nyonso, na science nyonso to kima yankaka, buku nyonso ya mbote yina ba sonikaka, ata mosi ve lenda tuba na beno yawu. Yayi kele maneti ya kutala ya Nzambi, ya ke lakisa yina Yandi kele mpe yina beno kele. Na manima, na kati-kati ya kele na nzila-Menga, yina ke lakisa yina beno lenda vwanda kana beno zola kusala nsodolo. Beno bawu yayi.

113 “Na nzila ya Mpeve mosi,” ntangu yayi, ya Ntete ya Corinthiens 12. Wapi mutindu beto ke kota na kati ya Nzutu yango?

“Na kupesanaka maboko?” Ve, tata. “Na nzila ya kukuma ya dibuundu?” Ve, tata. “Na nzila ya kuzwa mbotika na manima, na mantwala? Na nkumbu ya Tata, Mwana, mpe Mpeve-Santu? Na Nkumbu ya Yesu Klisto? Na nkumbu ya Rose ya Sharon, ya Lis ya Vallée, ya Mbwetete ya Suka? Nyonso yina beno zola?”

Yina kele ve na kima ya kusala na yawu. “Kaka mvutu ya konsiasi ya mbote na ntwala ya Nzambi.” Mpe dyaka beto ke sala bamambu, mpe ke dasuka, mpe ke swana, mpe ke kabuka, mpe ke sala baluswaswanu. Ya kele kieleka. “Kasi nyonso yina kele bisalu ya kufwa.” Beto ke na kwenda na ya kulunga.

114 Ya kele bima yina mu ke salaka. Mulongi botikaka beno. Ata ti yandi botikaka beno kizizi na ntwala, na manima, to bambala tatu, bambala yiya, to mbala mosi, to mutindu yandi salaka yawu, yina kele na kima mosi ve ya kusala na Yawu. Beno kele kaka ya kubotika na kati ya kubundana ya dibuundu yina, na mutindu nyonso, na kulakisaka na dibuundu yina ti: beno ke kwikila na lufwa, luzikulu, mpe mvumbukulu ya Klisto. Na kutentika ya maboko, samu na kubelusa bambevo, ya kele mbote mingi, kasi, ya kele nyonso ya yinza, mpe nzutu yina ke kufwa dyaka kaka mutindu beno ke na kuzingila. Ya ke kufwa dyaka. “Ntangu yayi ti beto bika bima yango nyonso na lweka, mpe beto kwenda na ya kulunga.”

115 Wapi mutindu beto ke kuma na kulunga? Ya kele yina beto zola kuzaba.

. . . Klisto *me nata na kulunga* . . .

“Nzambi me tula na zulu ya Yandi disumu ya beto nyonso ya nko. Yandi lwalaka samu na masumu ya beto, kubukanaka samu na masumu ya beto ya nko, kitumbu ya ngemba ya beto na zulu ya Yandi, na bamputa ya Yandi beto belukaka.” Ya kele Nzutu yina ti beto zola kukuma. Ya kele Nzutu yina. Samu na yinki? Kana beno kele na kati ya Nzutu yango, ata mbala mosi ve ti beno ke mona lusambusu, ata mbala mosi ve ti beno ke meka lufwa. Beno kele na kimpwanza na nyonso ya lufwa, lusambusu, disumu, mpe nyonso yankaka, na yina beno kele na kati ya Nzutu yango.

116 “Wapi mutindu beno ke kota na kati ya Yawu, mulongi? Na kukumaka ya tabernacle yayi?” Beno kele yimeni, ya kuzimbana. Na mutindu nyonso, beno lenda ve kukuma yawu; beto kele na ata buku ya bankumbu ve. “Wapi mutindu beto ke kota na kati ya Yawu? Na kukumaka ya dibuundu mosi?” Ve, tata. “Wapi mutindu beno ke kota na kati ya Yawu?” Beno kele ya kubutama na kati ya Yawu.

117 Ya Ntete ya Corinthiens 12.

*Na yina na nzila ya Mpeve mosi beto nyonso kele ya kubotika na kati ya nzutu mosi, . . .*

118 Na nzila ya mbotika ya Mpeve-Santu, beto kele ya kubotika na kati ya Nzutu yango, mpe kele na kimpwanza na disumu. Nzambi ke mona dyaka beno ve; Yandi ke mona kaka Klisto. Mpe na yina beno kele na kati ya Nzutu yango, Nzambi lenda ve kufundisa Nzutu yango. Yandi fundisaka Yawu yimeni. Yandi bakaka balusambusu ya beto mpe bokilaka beto na kati. Mpe na nzila ya lukwikilu, na nzila ya lemvo, beto ke tambula mpe

ke ndima lemvo ya beto. Mpe Mpeve-Santu ke nata beto na kati ya kubundana yayi na Yandi. “Mpe beto ke tambula dyaka ve landila bima ya yinza, kasi beto ke tambula na kati ya Kimpeve.”

Na kupesa ngolo, Ndinga kwizaka na beto. Yandi kufwaka na kisika ya munu. Mu me kuma ya moyo. Munu yandi yayi, yandi yina vwandaka mbala mosi ya kufwa na disumu mpe bayimbi, me kuma ya moyo. Bansatu nyonso ya munu kele ya kusadila Yandi. Zola nyonso ya munu kele na Yandi. Bakutambula nyonso ya munu zola kuvwanda na Nkumbu ya Yandi, ti kisika nyonso mu ke kwenda, nyonso yina mu ke sala, mu ke kembisa Yandi. Kana mu ke na kuzomba, kana mu ke na kuloba, kana mu ke na kubula balon, kana—kana mu kele. . . nyonso mu ke sala, mu fwana vwanda, “Klisto na kati ya munu,” na mutindu mosi ya luzingu, yina ke sala bantu ke zola kuvwanda mutindu yina; kutonga ve, kutuba yimbi ya bampangi, mpe bamambu na yina me tala mabuundu ya beno. Beno me bakula yawu?

“Na nzila ya Mpeve mosi beto kele ya kubotika na kati ya Nzutu yango.” “Mpe ntangu Mu ke mona Menga, Mu ke luta na zulu ya beno.”

<sup>119</sup> Beno kuwa. Beto tanga kaka mwa ntama awa, lemvo ya beno.

. . . yina ata mbala mosi ve zolaka *kusala bayina vwandaka kwenda ya kulunga*.

“Na yawu. . .” nzila ya 2, kapu ya 10.

*Na yawu ve kuna bawu zolaka bika kupesa minkayulu?*

<sup>120</sup> Kana yina lendaka na kusala muntu ya kulunga. . . Mpe Nzambi ke lomba kulunga. Kana kuzitisa misiku, kana kusadila misiku nyonso, ke sala beno kukuma ya kulunga, na yina ya kele dyaka ve—ya kele dyaka ve na nsatu ya kuzwa kima yankaka; beno me kuma yimeni ya kulunga. Samu ti, na yina beno kele ya kulunga, beno kele ya Seko. Samu ti, Nzambi kele kaka Yandi yina kele ya Seko, mpe Nzambi kele kaka Yandi yina ya kulunga. Mpe mutindu kaka beno lenda vwanda ya Kukonda nsuka, ya kele kukuma kitini ya Nzambi. [Kisika ya mpamba na bande—Mu.]

. . . na mbala mosi na kukumaka ya kuvedila zolaka. . . dyaka ve na ntima na disumu.

Yinki? “Musambidi na mbala mosi na kukumaka ya kuvedila, ke kuzwa dyaka ve *konsiansi*. . .” Kana beno sonika mbangululu ya yawu, ya kele “nsatu.”

. . . musambidi na mbala mosi. . . ke dyaka ve na nsatu na disumu.

. . . kana musambidi na mbala mosi vwandaka ya kuvedila. . .



121 Beno ke kwenda ntangu yayi mpe ke tuba, “Oh, alleluia, mu me vulusa mazono na nkokila. Kasi, mbote, nkembo na Nzambi, *kento* me vutula munu manima. Alleluia, kilumbu mu ke vulusa dyaka.” Beno ya mawa ya kukondwa kutanga na kimbangi. Ya kele ve mutindu ya kele.

122 “Musambidi na mbala mosi na kukumaka ya kuvedila ke dyaka ve na konsiansi na disumu,” Biblia ke tuba. Beno kuwa, na yina beto ke landila na kutanga, kaka minuti.

*Kasi na minkayulu yango . . . kubambuka moyo na disumu konso mvula.*

123 Ntangu yayi beto ke kwenda na yisi, na kukuma na nzila ya 8, samu na kulanda ntangu, mpe kukuma kisika mu zola kukuma.

*Na ntete kuna ntangu yandi tubaka, Munkayulu mpe makabu mpe bibulu ya kuyoka . . . samu na disumu nge zolaka ve, to dyaka sepelaka na yawu; yina ba ke pesaka landila musiku;*

124 Nzila ya 9.

*Na manima yandi tubaka, Beno tala, mu ke na kwiza na kusala luzolo ya nge, O Nzambi. Yandi katulaka . . . katula . . . Yandi katulaka ya ntete, musiku, samu ti yandi tula ya zole.*

125 Kana beto vwanda na ntangu samu na kuvwanda na zulu ya yawu. Ntangu nyonso yina beno kele Presbytérein, to ya Pentecote, to Baptiste, to Méthodiste, Yandi lenda ve kusala kima mosi na beno. Yandi fwana kukatula nyonso yina, ntete, beno me mona, samu Yandi tula ya zole. Ntangu nyonso yina beno ke tuba, “Mbote, mu kele Méthodiste.” Ah, mu kele na ata dyambu ve na ba-Méthodiste, to ba-Baptiste, to bantu ya Pentecote. Kasi, mpangi, ya me—ya me tadila ve yawu. Beno fwana landila kukwenda na ya kulunga, ya kele na kati ya Klisto.

126 Beno tala yayi mbote ntangu yayi, kaka minuti.

*Na nzila ya yina . . . beto kele ya kusantisa na nzila ya dikabu ya nzutu ya Yesu Klisto kaka na mbala mosi.*

127 Hein? Beto tanga kaka mwa fyoti, mpe beno simba yawu. Beno bika yawu kukota na yina beto ke na kutangaka, “Kaka na mbala mosi.”

*Mpe konso nganga-Nzambi ke telamaka konso kilumbu na kusala kisalu mpe ke pesa ntangu nyonso munkayulu mosi, yina lenda ata mbala mosi ve kukatula disumu:*

*Kasi muntu yayi, . . .*

Beno me yilama? Beno kele na kazaka ya beno ya kufunguka ntangu yayi, samu ti ya luta ve, ya ke kwenda mbala mosi na ntima? “Kasi Muntu yayi.” Wapi Muntu? Pape ya Rome ve,

évêque ya dibuundu ya ba-Méthodiste ve, to ya ata dibuundu mosi yankaka ve.

*Kasi muntu yayi, Klisto, na manima yandi me pesa munkayulu mosi samu na disumu, me kwenda vwanda ntangu nyonso na lweka ya bakala ya Nzambi;*

*Katuka ntangu yayi yandi ke na kwingila tii bambeni ya yandi ke kuma kinyatila ya yandi.*

Beno tala mbote. Yawu yayi ke na kwiza.

*Samu ti na kupesa mosi yandi me kumisa ya k-u-l-u-n-g-a, yandi me kumisa ya kulunga. . .*

“Tii lukutakanu ya reveil yina ke kwiza”? Yinki ya ke tuba?

*. . . yandi me kumisa ya kulunga samu na ntangu nyonso bayina kele ya kusantisa.*

Beno me bakula yawu? “Ti beto kwenda na ya kulunga.”

<sup>128</sup> Ntangu yayi beno bantu ya sainteté ke tuba, “Oh, yinga, beto ke kwikila na busantu. Alleluia! Beto ke kwikila na busantu.” Kasi beno ke na kubaka ya beno. Beno me bika kaka *yayi* mpe me bika *yina*. Beno zaba ti beno zolaka sala yawu ve.

Kana ti Klisto me fungula moyo mpe me pesa yawu ngolo na ntima ya beno, mpe beno me kuma kisika disumu me kufwa, mpe nsatu, yawu nyonso me kwenda. Na yina, Yandi me katula kusungama ya beno mosi, Yandi me tula Yandi mosi na kati ya beno. “Mpe ya kele Klisto, Mwana ya Nzambi, na kati ya beno, kivuvu ya Nkembo.”

*. . . ti beto kwenda na ya kulunga;*

<sup>129</sup> Wapi mutindu beto lenda vwanda ya kulunga? Na nzila ya lufwa ya Klisto. Ve na nzila ya kukumaka ya dibuundu. Ve na nzila ya bisalu ya mbote ya beto, yina beto ke salaka. Ya kele nyonso nyonso ya kulunga. Ve samu ti beto kuzwaka mbotika mutindu *yayi* to mutindu *yina*. Ve samu ti beto belukaka, na nzila ya kutentika ya maboko. Ve samu na bima nyonso yayi yankaka, “Beto ke kwikila na lufwa, luzikulu, mpe mvumbukulu.”

<sup>130</sup> Paul tubaka, “Mu lenda zonga na ndinga mutindu bantu mpe Bawanzio,” ya kele nyonso zole bandinga yina ba lenda bakula mpe bandinga yina ba lenda bakula ve, yina ba fwana tendula, “Mu kele kima mosi ve. Ata ti mu kele na dikabu ya luzabu mpe ke bakula ndwenga nyonso ya Nzambi,” lenda tendula Biblia, katuka . . . ke vukisa yawu kintwadi, “Mu kele kima mosi ve.” Na yina ya ke sala mingi mbote ve na kukwenda na lukolo, mutindu yina ve, na kulongoka Biblia? “Ata ti mu kele na lukwikilu yina mu lenda katula myongo. . .” Balukutakanu ya kubeluka ya nzutu zola kutuba mingi kwandi ve kuna, mutindu yina ve? “Mu kele kima mosi ve. Ata ti mu pesa nzutu ya munu na kuyoka mutindu munkayulu.”

<sup>131</sup> “Oh,” bawu ke tuba, “muntu yina kele musambidi.”

132 “Kasi yandi kele kima mosi ve,” Paul ke tuba, “ata mbala mosi ke kuma kima mosi.”

133 “Samu ti kisika ya kele na bandinga, ya ke suka; kisika ya kele na bapofesi, ya ke kubwa; kisika ya ke vwanda na bima nyonso yayi yankaka, ya ke kubwa. Kasi ntangu yina kele ya kulunga ke kwiza, yina kele ndambu ke zimbana.” Beno me mona, ya “kulunga.” Yinki kele ya kulunga? Zola. Yinki kele zola? Nzambi. “Ti beto bika na lweka mwa bisalu nyonso yayi ya kufwa mpe balutumu, mpe kukwenda na ya kulunga.” Beno me mona yawu? Beto kele ya kulunga na nzila ya Klisto. Wapi mutindu beto ke kota na kati ya Yawu? Na nzila ya mbotokolo ya Mpeve-Santu.

134 “Mbote mingi, yinki me salama?” Beno luta lufwa na Luzingu.

135 “Mbote, kana mu tekita, dumuka, ya ke sala yawu?” Beno—beno ve, ke na kima mosi ya kusala. Beno me sala yawu yimeni, Nzambi me nata beno katuka lufwa na Luzingu, mpe beno kele moyo. Na yina bambuma ya beno ya luzingu ke lakisa yawu.

136 Mingi ya beno ba-Méthodiste mpe ba-Nazaréen kubokaka kaka ngolo mutindu beno lendaka kuboka, ke yiba masangu na bilanga ya muntu, ya kele mbote, kusala nyonso yina lenda vwanda.

137 Mingi ya beno bantu ya Pentecote kuzonzaka na bandinga, mutindu kutsyamuna wandu na zulu ya mpusu ya ngombe, kieleka, ke basika kaka mpe ke kwenda na kento ya muntu yankaka, ke sala mitindu nyonso ya bima. Ya kele Yawu ve, mpangi.

138 Beno meka ve na kuzwa kuningana mosi ya nzutu to kima na kubaka kisika ya Mpeve-Santu. Ntangu Lubutuku ya malumu ke kwiza, beno me soba. Beno ke lenda ve kusala kima mosi samu na kumonisa yawu. Luzingu ya beno ke monisa yawu, mutindu beno ke tambula. Beno kele zola, ngemba, kukanga ntima, lutondo, mvibudulu. Ya kele yina beno kele, mpe yinza ya muvimba ke mona kotalana ya Yesu Klisto na kati ya beno.

139 Ntangu yayi, kutuba na bandinga, kuboka kuna, yina kele kaka binama yina ke tambula na mutindu yayi ya Luzingu.

Mpe beno lenda baka, kulandila binama yango, mpe kuzwa ata mbala mosi ve Luzingu yango. Beto ke mona yawu. Bantu yikwa zaba ti ya kele kieleka? [Dibuundu me tuba, “Amen.”—Mu.] Kieleka, beno zaba. Kieleka beno zaba. Oh! Beno ke mona yawu bisika nyonso pene-pene ya beno.

140 Na yawu, ya kele na kima mosi ve yina beno lenda tuba kele nzikisa ya Mpeve-Santu, kana ti ya kele luzingu ya beno yina beno ke zinga. Ntangu yayi, kana beno zola kutuba na bandinga, ya kele kieleka nyonso ya kulunga kana beno zinga luzingu yina ke simbidila yawu. Ya kele kieleka. Mpe kana beno zola kuboka,

mbote, ya kele mbote. Mu ke bokaka, mpe, ke kumaka kieleka na kyese bantangu yankaka ti na mpasi mu lenda vwanda na basapatu; mu ke vwanda mutindu na kukatula yawu kudumuka. Mpe ya kele mbote. Mu ke kwikila yawu.

<sup>141</sup> Mu me mona ba-vision, mpe bambevo kubeluka, bantu ya kufwa kuvumbuka. Na yina ba kele ya kutula kuna mpe badokotolo me kwenda mpe me tuba, “Bawu me suka mpe me kufwa,” ya kulala kuna mwa bangunga; mpe Mpeve-Santu vwanda kulumuka kuna mpe vwanda lakisa vision, vwanda kwenda kuna mpe vwanda vumbula muntu yango. Mu kumonaka bayina vwandaka ya kufwa makutu, bababa, mpe bampofo, mpe bikata, na kutambula. Yina kele ve . . . Yina kele kaka binama.

<sup>142</sup> Mpangi, ntangu mingi me luta, ntete yinza kuzwa lufulu ya yawu; Nzambi na nzila ya lemvo ya Yandi ya Seko, Yandi talaka na yisi, mpe na luzabu Yandi kumonaka beno mpe munu. Yandi zabaka na wapi nsungi beto ke zingila. Yandi zabaka yinki beto ke vwanda. Na yawu, na nzila ya nsodolo, Yandi soolaka beto ntete mbandukulu ya yinza, na kuvwanda na Yandi kukondwa ditona.

<sup>143</sup> Ntangu yayi, kana Yandi soolaka beto ntete mbandukulu ya yinza na kuvwanda na kati ya Yandi kukondwa ditona, mpe beto kele ya kubutama ya kufuluka na matona, mpe kima mosi ve yankaka lenda . . . kima mosi ve lenda sukula beno, wapi mutindu beto ke vwanda kukondwa—wapi mutindu beto ke vwanda kukondwa ditona? “Yandi me fidisa Mwana kaka yina me basika na Yandi, ti muntu nyonso yina ke kwikila na Yandi ke kuzwa ve nsuka ya luzingu, kasi kele na Luzingu ya Seko; ata mbala mosi ve ke kufwa, kasi kele na Luzingu ya Seko.” Na yina ntangu beto ke kota na Yandi, na nzila ya lukwikilu, na nzila ya lemvo beto kele ya kuvuuka, na nzila ya Mpeve-Santu yina ke na kubokila beto.

<sup>144</sup> Ntete ya vwanda na nzutu na zulu ya ntoto yayi, banzutu ya beno vwandaka ya kutula awa. Ya kele ya kusala na calcium, potasse, madidi, nsemo ya yinza—ya yinza, mpe pitiloyi, mpe nyonso yankaka yina, bima kumi na sambanu. Mpe Mpeve-Santu me banda na kufuka ntoto, “na kusosa yandi makangu.” Mpe na yina Yawu vwandaka sala, kima ya ntete beno zaba, ya me kwiza mwa fololo ya Paki. Na yina Yandi vwandaka fuka me basika matiti, mpe mwa bandeke, mpe na manima ya mwa ntangu fyoti, muntu me basika.

<sup>145</sup> Ntangu yayi, Yandi salaka ata mbala mosi ve kento na fundu-fundu ya ntoto. Kento kele yimeni bakala, na kubanda; bakala mpe kento kele muntu mosi. Na yawu Yandi bakaka na lweka ya Adam, na lupanzi, mpe salaka kento, kisadisi samu na yandi. Mpe na manima disumu me kota. Kuna na manima disumu me kota . . .

146 Ba ke nunga Nzambi ve, ata nyonso yina ke salama. Ata mbala mosi ve ti ba ke nunga Yandi. Na manima, bakento kubandaka na kunata bantu na zulu ya ntoto. Mpe Nzambi, na nzila ya lemvo ya Seko, kumonaka nani ke vuuka, mpe Yandi bokilaka beno. “Muntu ve lenda kwiza na Munu, kana ti Tata ya Munu kubokila yandi, ntete.” “Ve na yandi yina zola, to na yandi yina ke sala, kasi na Nzambi yina ke talaka kyadi.”

147 Beno ke tuba, “Mbote, mu me sosa Nzambi. Mu me sosa Nzambi.” Ve, beno ve. Nzambi sosaka beno. Ya kele mutindu ya vwandaka na mbandukulu.

148 Ya vwandaka ve Adam vwandaka tuba, “O Tata, Tata, mu me sumuka. Wapi kisika Nge kele?”

149 Ya vwandaka Tata vwandaka tuba, “O Adam, Adam, wapi kisika nge kele?” Ya kele nkadulu ya muntu. Ya kele mutindu ya kusadila ya muntu. Ya kele mutindu yandi kele ya kusala.

150 “Mpe muntu ve lenda kwiza na Munu kana ti Tata me benda yandi. Mpe nyonso yina Tata me pesa Munu. . .” Alleluia! “Bayina nyonso ke kwiza, Mu ke pesa bawu Luzingu ya Seko, mpe Mu ke vumbula yandi na kilumbu ya nsuka.” Wapi nsilulu ya kusakumuna, wapi nsilulu, ya Nzambi ya Mazulu! Kisika beto ke kuma na nkokila yayi, kisika, “Yandi zengaka ndefi na Yandi mosi.” Ya kele ve na mosi ya kulutila nene. Beno ke zenga ndefi na muntu me lutila beno nene. Ya kele ve na mosi ya kulutila nene, na yawu Nzambi zengaka ndefi na Yandi mosi. Beto ke na kukota na yawu, wapi mutindu Yandi salaka yawu mpe na wapi ntangu Yandi salaka yawu; mpe zengaka ndefi na Yandi mosi, ti Yandi zolaka vumbula beto mpe kusala beto difwa ya Yandi mosi.

151 Oh, wapi mutindu ya kulunga mpe ya ngolo beto lenda telama, na suka yayi! Mutindu beno lenda tala, kana lufwa ke na kutala beno mbala mosi na meso, beno ke tuba mutindu Paul, “Lufwa, wapi kisika kele ntunga ya nge? Ntoni, wapi kisika kele lunungu ya nge? Kasi matondo na Nzambi, Yandi yina pesaka beto lunungu na nzila ya Mfumu ya beto Yesu Klisto.” Beno bawu yayi. Samu na yinki?

152 “Oh, nge me sala *yayi-mpe-yayi*.”

153 “Mu zaba yawu, kasi mu kele ya kufuka na Menga ya Yandi.” Alleluia!

154 “Na nzila ya Mpeve mosi, beto nyonso kubotamaka na kati ya Nzutu mosi.” Beno ba-Méthodiste, ba-Baptiste, ba-Presbytérien, nyonso yina beno kele, beto kubotamaka na kati ya Nzutu ya mosi. Beto ke bundana, mpe beto kele bantu ya yinsi ya Kimfumu ya Nzambi, ke tuba ti, “Beto kele ve ya yinza yayi.”

155 Mwa Mwana ya munu ya kento kwizaka, kilumbu yankaka yina, tubaka, “Papa, mwa mwana ya kento yayi me sala *yayi-mpe-yayi*. Mpe bawu salaka *yayi-mpe-yayi*. Beto kwendaka

na yinzo. Bawu salaka *yayi-mpe-yayi*.” Mu tubaka. . . Yandi tubaka, “Samu na yinki beto lenda sala yawu ve?”

156 Mu tubaka, “Chérie, beto kele ve ya yinza yina. Bawu ke zinga na yinza ya bawu mosi.”

157 Yandi tubaka, “Beto nyonso ve ke tambulaka na ntoto mosi?”

158 Mu tubaka, “Ya kele yinza, chérie. Beto kele ve ya bantu yina.”

159 Biblia ke tuba, “Beno basika na kati ya bawu, beno kabwana, me tuba Nzambi.” Beno me mona, beno kele ve ya yina. Mpe ntangu Nkadulu yango ya malu-malu ke kwiza na kati ya beno, ba ke vwanda ve na nsatu ya kubasisa beno na ngolo. Beno ke zola ve kuvutuka, mutindu kento ya Lot. Beno me butama kaka, na ngaanda ya yawu. Mpe beno kele na kati ya kitezo yankaka. Mpe ya ke talana kima ya mpamba samu na beno.

Mpe Amerika yayi, ya nene, ya kutuba ve yina beto ke zingaka, me kuma poto-poto mosi ya nene ya yawu. Nyonso kele kulula mpe bakento. Mpe bakento mutindu bawu ke kulwata, babakala mutindu bawu ke na kusala, mpe—mpe bima yina bawu ke na kusala, mpe kuna kukibokila, “Miklisto.”

160 Beto baka mutindu, Elvis Presley yayi, yandi me kwenda mpe me kuma muntu ya dibuundu ya Pentecote ntangu yayi. Kieleka, ya kele kisika. . . Judas kuzwaka makumi tatu ya mbongo ya kisengo. Elvis me kuzwa mvula ya ba-Cadillac, mpe—mpe mwa mafuku ya ba-dollar, na kutekisaka bukuluntu ya yandi. Arthur Godfrey. Beno tala yina.

161 Beno tala awa Jimmy Osborne na Louisville, na ngaanda kuna na mutindu yina ya boogie-woogie, rock-and-roll, buzoba mpe mvindu. Mpe na Lumingu na suka, ke baka Biblia mpe ke telama na estrade mpe ke longi. Wapi nsoni!

Kukondwa ntembe ti Biblia ke tuba, “Mesa nyonso me fuluka na biluki.” Kasi, beto ke na kuzinga na kati ya kilumbu ya boma!

162 Mpe bantu ke tuba, “Oh, bawu kele kieleka misambidi.” Oh! Beno zaba ve ti dyabulu kele musambidi? Beno zaba ve ti Caïn vwandaka kaka musambidi mutindu Abel kuvwandaka? Kasi, yandi vwandaka ve na Luzayikisu. Kaka yina. Yandi vwandaka ve na Luzayikisu.

Yinga, beto nyonso ke kwendaka na dibuundu, kasi ya kele na bayina kele na Luzingu, ya kele bayina kele na Luzayikisu ya Yesu Klisto na kati ya ntima ya bawu. Ve samu na kutekita, kudumuka, ve samu na kukuma ya dibuundu. Kasi, Luzayikisu, Nzambi me monikisa Yandi.

163 Beno tala yinki ya ke tuba, “Yinki bantu ke tuba, Mu kele, Mwana ya muntu?”

164 “Bayankaka ke tuba ti Nge kele ‘profete.’ Mpe bayankaka ke tuba ti Nge kele ‘Élie.’ Mpe bayankaka. . .”

Yandi tubaka, “Kasi nani beno ke tuba?”

<sup>165</sup> Pierre tubaka, “Nge kele Klisto, Mwana ya Nzambi ya moyo.” Yina katukaka ve bikopa ya yandi.

<sup>166</sup> Yandi tubaka, “Kyese na nge, Simon, mwana ya Jonas, samu ti ata mbala mosi ve nzutu mpe menga me monikisa yayi. Nge me longoka yayi ata mbala mosi ve na mayela mosi—mosi ya Biblia, to na seminere ya théologie mosi. Kyese na nge, samu ti nzutu mpe menga ve me monikisa yayi na nge. Kasi Tata ya Munu yina kele na Mazulu me monikisa yawu. Mpe na zulu ya ditadi yayi Mu ke tunga Dibuundu ya Munu, mpe bankotolo ya difelo ke telemina Yawu ve.”

<sup>167</sup> Kana beno kele Muklisto, na suka yayi, samu ti beno kele ya dibuundu, beno kele ya kuzimbana. Kana beno kele Muklisto samu ti beno me luta lufwa na Luzingu, beno kele na kimpwanza na lusambusu; na kati ya Klisto, beno ke belama ntangu nyonso na kati ya kulunga. Nzambi lenda kumona kima mosi ve. Beno ke tuba, “Mbote, mu ke sala ata foti ve?” Kieleka, kasi beno ke sala yawu ve na luzolo ya beno mosi.

<sup>168</sup> Ntangu yayi beto ke na kukota na kati ya yawu, kaka na mwa baminuti, “Samu ti yandi yina ke sumukaka na luzolo ya yandi mosi na manima yandi me kuzwa luzabu ya Kieleka, ya kele dyaka ve na munkayulu samu na disumu.” Beto ke kota na yawu na nkokila yayi, samu ti ntangu me kwenda mwa ntama ntangu yayi.

<sup>169</sup> Beto tanga kaka mwa banzila mingi ya yayi, samu beto kuwa mbote na yina beto me kwenda mwa mingi na yisi. Mbote mingi. Mbote, beto ke banda kaka na yawu na nkokila yayi, na nzila ya 4. Beno kuwa yayi.

*Samu ti ya lenda vwanda ve samu na bayina  
vwandaka mbala mosi ya kutemuka, mpe sala . . . mpe  
me vwanda . . . mpe me meka ngolo, makabu ya mazulu,  
mpe bayina me vwanda kintwadi na Mpeve-Santu,*

*Mpe . . . me meka ndinga ya mbote ya Nzambi, mpe  
ngolo ya yinza ke kwiza,*

*Kana bawu kubwa, kuvutuka ya bawu mosi . . . na  
kubalula ntima; . . .*

Beno me mona? Mpe beto ke baka yawu na Hébreux 10, mpe kufwanikisa, samu na kulakisa yinki yayi kele.

<sup>170</sup> Bankundi, “Ti beto kwenda na ya kulunga.” Beto kele . . . beto kele ve . . . Beto kele kukondwa raison bubu yayi. Beto kele na ata raison, at fyoti ve. Nzambi ya Mazulu me monana na kilumbu ya nsuka yayi mpe ke na kusalaka bima kaka mosi yina Yandi salaka kuna, ntangu Yandi vwandaka awa ntete, ntangu Yandi vwandaka na zulu ya ntoto. Yandi me monisa, mutindu beto ke na kwiza na nzila ya Biblia yayi. Mpe beno—beno, kalasi, zaba yayi, ti beto me baka kimangu na manima ya kimangu, mpe

kidimbu na manima ya kidimbu, mpe dyambu ya ngitukulu na manima ya dyambu ya ngitukulu, yina Yandi salaka na bana na ntoto ya kuyuma, bima mpe bidimbu yina Yandi salaka; bima yina Yandi salaka ntangu Yandi vwandaka awa na zulu ya ntoto, kumonisama na nzutu; mpe bima kaka mosi ke na kusalamaka bubu yayi, kaka awa na kati-kati ya beto. Awa kele Ndinga yina ke siamisa yawu. Awa kele kima mosi yina ke tuba ti ya kele kieleka, yina ke sala yawu kieleka. Awa kele Mpeve ya Nzambi na kusala kima mutindu mosi, na yawu beto kele ya kukondwa mawa.

Beto sambila.

<sup>171</sup> Tata ya Mazulu! Na kumonaka ti beto kele ya kuzunga na matuti ya nene ya bambangi, ti beto losa dyambu nyonso, nyonso, yimbi nyonso, dyambu nyonso ya yimbi, dyambu nyonso ya yimbi yina basikaka, dibanza nyonso, “mpe ti beto kima na kukangaka ntima mbangu yina kele ya kutula na ntwala ya beto, na kutalaka na mfumu mpe mumanisi ya lukwikilu ya beto, Mfumu Yesu Klisto.” O nkembo na Nkumbu ya Yandi ya santu mpe yina ba lenda fwanikisa ve! Mutindu ti Yandi kwizaka na ntoto samu na kuvulusa muntu yina kubwaka, mpe samu na kuvutula bawu na kati ya kubundana ya Mfumu Nzambi. Mpe beto ke tonda Nge samu na yayi. Mpe ntangu yayi na lemvo ya Yandi. . . . Ata mbala mosi ve ti beto soolaka Yandi, kasi Yandi soolaka beto. Yandi tubaka, “Beno ve soolaka Munu, kasi Mu soolaka beno.” Na wapi ntangu? “Ntete mbandukulu ya yinza.”

<sup>172</sup> Mpe, Nzambi ya luzolo, kana ya kele na bayina kele ya kuvwanda awa na suka yayi, bayina na kutala vwandaka vutula yayi na ntwala bamvula mpe bamvula, kasi ntangu nyonso ya kele na mwa kukonkoka na ntima. Ya lendaka vwanda ti bawu me kuma ya dibuundu, na kubanzaka, “Mbote, nyonso ke vwanda mbote.” Tata, kieleka, Masonuku me bangula yawu na suka yayi: ti beno lenda bumbama ve na manima ya dibuundu, mpe kuvwanda ya kusungama; to dyaka kuvwanda mbote, kuvuna ve mpe kuyiba mpe kusala kima ya yimbi, mpe dyaka kuvwanda ya kulunga.

<sup>173</sup> Ya kele kaka na ludedomo mosi yina kele na beto, ya beto mosi ve, kasi ludedomo ya Yandi. Yandi me kumisa mpulusu ya beto ya kulunga. Na yawu, na kuvwandaka na kati ya Yandi, Nzambi ke monaka ve bafoti ya beto. Ntangu beto ke sala kima mosi ya yimbi, ya kele na Mpeve na kati ya beto yina ke dila, “O Tata, lemvo kila munu!” Na yina Nzambi ke monaka yawu ve. Mpe ya kele, beto kele ya kunata na kati ya kubundana mpe lemvo na Yandi. Pesa yawu, Mfumu, na yina beto ke kanga lukutakanu yayi, na Nkumbu ya Klisto. Amen.

<sup>174</sup> Kaka mwa ntangu fyoti, mu zola kuyufula beno. Ata nyonso yina beno ke sala, beno kele ya kuzimbana. Beno kuwa yayi.



Bilumbu me luta . . . Ya lendaka vwanda ti mu tubaka yawu na ntwala. Awa keke kimbangi ya fyoti yina salamaka na munu.

175 Mu vwandaka na—na Toledo, na Ohio. Mu vwandaka na réveil mpe—mpe vwandaka na lukutakanu kuna mpe bantu vwandaka mingi. Bawu zabaka hôtél yina munu vwandaka vwanda; na yawu ba nataka munu na bwala. Mu vwanda vwanda kuna, na mwa motel mosi.

176 Beto vwanda kudyaka na mwa restaurant mosi Dunkard. Ya vwandaka kisika mosi ya mbote, ya bamama kuna, vwandaka kaka mutindu Miklisto mpe basantu na kutalaka mutindu bawu vwandaka, ya tsyema mpe ya mbote mingi. Lumingu kumaka, mu kuzwaka nsatu ya madia. Mu vwanda manga madia fyoti. Mpe mu zolaka sabuka bala-bala na kukwenda na yankaka, samu na kudya fyoti. Na mwa nzila mosi kuna na nsongi, mpe ya vwandaka kaka na kisika mosi, na mutindu ya Amerika, ya ntangu nyonso, samu na kudya. Mwa, ya vwandaka na mwa kisika mosi, kafe, ya kufunguka mpimpa nyonso. Ntangu mu kotaka kuna na Lumingu yango, pene ya ngunga zole na manima ya midi, ntete mu kwenda na kulonga manima ya midi yango, mu vwandaka mingi ya kuyituka, mu zabaka ve yinki ya kusala.

177 Mu me kota na kati, mpe kima ya ntete yina mu talaka vwandaka ntwenya ya mama pene ya bamvula kumi na sambanu, kumi na nana, chérie ya papa mosi, chérie ya mama mosi, ya kuvwanda na manima kuna na mwana mosi ya bakala, na maboko ya yandi ya kuzunga luketo ya yandi. Nkonga ya bantwenya ya kuvwanda na—na comptoir.

178 Mu kuwaka makelele ya masini ya mbongo. Mu me tala lweka *awa*, mpe ya vwandaka na pulusu ya kutelama kuna na diboko ya yandi ya kuzunga kento mosi, na zulu na kuzunga awa, na ntela ya yandi, mpe vwanda bula na masini ya mbongo. Ntangu yayi, beno zaba ti nsaka ya mbongo mpe masini ya mbongo keke na ngaanda ya musiku na Ohio, beno bantu ya Buckeye awa. Mpe beno zaba ti ya keke na ngaanda ya musiku. Mpe awa vwandaka na muntu ya musiku, yina vwandaka bula masini ya mbongo; mpe bakala ya bamvula ya munu, na kutala lendaka vwanda ya kukwela, na nkonga ya bana, mu banza lendaka vwanda nkooko ya bakala. Pulusu, yina ke vwandaka na nzila, ke na kubulaka masini ya mbongo. Ya vwandaka na ntwenya yina . . . Yinki ntwenya vwandaka sala kuna? Yinki yandi yayi vwandaka sala kuna?

179 Mu telamaka kuna. Muntu ve talaka munu kukota, ba vwandaka na bisalu mingi, ndambu ya bawu vwandaka ya kukola. Na yawu, mu vwandaka tala mbote. Mu kuwaka muntu kutuba, “Mbote, nge banza ti mvula ke bebisa rhubarbe?” Mpe mu me baluka na kutala lweka awa, mpe awa vwandaka ya kuvwanda mama mosi kuna, mama ya kukula, kieleka . . . Yandi vwandaka na bamvula makumi sambanu na tanu, makumi

sambwadi, pene-pene na yawu. Mpe mama yango ya mawa . . . Mu ke semba ve muntu nyonso yina ke zola kutalana mbote. Kasi ntangu yandi . . . Yandi kubongamaka yandi mosi, salaka nsuki ya yandi bleu, bleu ya kieleka na kutala. Mpe nyonso ya kuzenga, na zulu-zulu, mpe salaka yawu bleu ya kieleka. Mpe yandi salaka kieleka manucure ya nene, to mutindu beno ke bokila kima yina yandi tulaka na kizizi ya yandi, mpe matona ya nene. Mpe yandi vwandaka ya kulwata kupe ya fyoti, mpe kima yango ya mawa vwandaka na mifutu mingi ti nsuni, mafuta, nsuni vwandaka ya kubwa mutindu *yina* na zulu ya makulu ya yandi. Mpe yandi vwandaka ya kukola. Yandi vwandaka ya kuvwanda kuna na bakala mosi ya kukula, mpe ya vwandaka na *été*, na ya kulwata kinkuti yayi ya ntama ya zulu ya basoda ya gris, to gris-vert. Ya vwandaka ya kubwa mutindu *yina*, mpe lele ya nene ya laka ya kuzunga laka ya yandi. Ya kukola, zole ya bawu, mpe bawu vwandaka na kento yayi ya mawa ya kukula.

<sup>180</sup> Mu telamaka kuna mpe vwandaka tala bisika nyonso. Mu tubaka, “Nzambi, wapi mutindu Nge lenda bika yawu? Wapi—wapi. . . Wapi mutindu Nge lenda tala mutindu ya bima yina? Na yina, ya ke sala munu, munu musumuki yina me vuuka na nzila ya lemvo, na kubanza na yawu, wapi mutindu—wapi mutindu Nge ke tala yawu? Mbote, ya ke talana mutindu ti Nge ke pasula kima nyonso. Bana ya munu Rébecca mpe Sarah ke kula na yisi ya mutindu ya lutumu yayi? Bana ya munu zole ya bakento fwana kukutana yinza ya bantu nyonso yayi, ya kuzabana mingi, mutindu ya kele bubu yayi, kisika bantu ke sala mutindu yina? Nzambi, wapi mutindu mu lenda . . . yinki mu lenda sala?”

Kieleka, ya kele lemvo ya Yandi. Kana bawu kele ya kusala ya Luzingu ya Kukonda nsuka, bawu ke kwiza na yawu. Kana bawu kele ve, bawu lenda ve. Mu zaba ve. Yina me tala Nzambi. Mu ke sala ya munu kitini.

<sup>181</sup> Mu banzaka, “Wapi mutindu Nge lenda bika yawu, Nzambi? Na kutala mutindu Nge kele ya santu mingi ti Nge ke katula kima yango na ntoto.” Mu tubaka, “Tala nkooko ya kento ya mawa yina ya kuvwanda kuna. Tala ntwenya ya kento yina na manima kuna. Mpe awa kele ya kuvwanda awa kento mosi, na kutala ya bamvula makumi zole na tanu. Mpe pulusu yina na maboko ya yandi ya kuzunga na ntela ya yandi, ke na kubulaka na masini ya mbongo. Mpe *kuna* kele muntu ya musiku; yinsi me suka. *Kuna* me suka bumama. *Awa* bukuluntu me suka. Mpe *kuna* kele ya kuvwanda na manima kuna ntwenya ya kento, mpe yandi me suka. Tala bana ya babakala, na yina bawu zolaka vwanda na dibuundu to kisika mosi.”

<sup>182</sup> Mu tubaka, “O Nzambi, yinki mu lenda sala? Mpe awa mu kele na mbanza yayi, ke na kudila na ntima ya munu nyonso, mpe bawu ke kipe yawu ve mpe ke tambula mutindu kana bawu vwandaka . . .” Mu banzaka, “Mbote, Nzambi?”

183 Mbote, kuna dibanza me kwiza, “Kana Mu bokilaka bawu ve, wapi mutindu bawu lenda kwiza? Nyonso yina Tata me pesa Munu ke kwiza. ‘Beno keke na meso kasi beno lenda ve kumona, makutu mpe beno lenda ve kuwa.’”

184 Mu banzaka, “Mbote, kana Mfumu ya luyalu zolaka kwiza na mbanza na kisika ya lukutakanu ya réveil, bantu nyonso zolaka basika. Oh, kieleka, yina keke mutindu ya yinza.”

185 Na yina mu me banda na kubanza, “Mbote, Nzambi, wapi mutindu, samu na yinki Nge lenda kaka ve, kukwiza, kufidisa Yesu mpe kusukisa yawu? Nge zola kaka—kaka ve kukwenda mpe kusukisa yawu nyonso, mpe kusukisa yawu?”

186 Kuna mu me banda na kumona kima mosi kutambula na ntwala ya munu. Ya vwanda talana mutindu kidyengila mosi ya fyoti yina vwandaka baluka mutindu *yayi*. Mu me landila na kutala yawu mbote. Mu me mona yinza kubaluka mpe kubaluka. Mu talaka yawu, mpe kisika ya vwandaka losa mwa maza ya kima. Mu me tala, mpe ya vwandaka kulosa ya mwa maza ya mbwaki, Menga ya mbwaki mingi, bisika nyonso, bisika nyonso ya yinza; mutindu kaka kidyengila ke na kubaluka, mutindu comète, mpe ya vwandaka na kidyengila yina vwandaka baluka mutindu *yayi*. Mpe mu vwandaka tala na kidyengila yayi. Mpe kaka na zulu ya yawu, mu me mona Yesu na vision. Yandi vwandaka tala na yisi. Mpe mu monaka munu mosi ya kutelama na yisi awa na zulu ya ntoto, ke na kusalaka bima yina mu zolaka sala ve. Mpe ntangu nyonso yina mu vwandaka sumuka, Nzambi zolaka kufwa munu, “Samu ti, kilumbu beno ke kudya yawu, kilumbu yina beno ke kufwa.” Mpe busantu mpe ludedomo ya Nzambi ke lomba yawu, mpe beno fwana kufwa. Mpe na yina mu me tala kuna. Mu me landila na kunika meso ya munu. Mu tubaka, “Mu keke ve. . . Mu kwenda lala ve. Mu keke. . . Ya keke vision. Mu zaba mbote-mbote ti yayi keke vision.”

187 Mu me landila na kutala mbote, na yina mu vwandaka ya kutelama na manima ya mwelo. Mpe mu me mona masumu ya munu mosi kumonana. Mpe konso ntangu yina bawu ke banda na kubula Kiti ya mfumu, Menga ya Yandi ke sala mutindu parechoc ya ditoma. Yawu vwanda kanga yawu, mpe mu vwanda mona Yawu kuningana, mpe Menga vwanda basika na kizizi ya Yandi. Mpe mu me mona Yandi kutelemisa maboko ya Yandi, mpe kutuba, “Tata, lemvokila yandi, yandi zaba ve yina yandi ke na kusalaka.”

188 Mu me mona munu mosi kusala kima yankaka, ya me ningisa dyaka Yandi, choc. Ya zola vwanda, Nzambi zola kufwa munu kaka kuna, kasi Menga ya Yandi vwandaka bumba munu. Ya vwandaka katula masumu ya munu. Mu banzaka, “O Nzambi, mu salaka yawu? Na kieleka ya vwandaka munu ve.” Kasi ya vwanda.

189 Na yina mu vwanda tambula mutindu *yayi*, mutindu ti mu vwandaka luta kivinga yango, mpe mu me belama na Yandi. Mu me mona buku mosi ya kuvwanda kuna, ya vwandaka na nkumbu ya munu na zulu ya yawu, mpe mitindu nyonso ya mikanda ya ndombi vwandaka ya kusonika na lweka ya yawu. Mu tubaka, “Mfumu, lemvokila yayi yina mu me sala. Masumu ya munu me sala Nge kusala yina? Ya kele munu yina me sala Menga ya Nge kuzungana na yinza? Mu me sala—mu me sala yayi na Nge, Mfumu? Mu me lomba lemvo na yina mu salaka yawu.” Mpe Yandi me telemisa maboko. Mu me tuba, “Nge zola kulemvokila munu? Mu banzaka na yawu ve. Mu ke . . . Nge, na nzila ya lemvo ya Nge, mu ke meka na kuvwanda mwana ya bakala ya mbote kana Nge sadisa kaka munu.”

190 Yandi me baka diboko ya Yandi mpe me bula lweka ya Yandi, me baka musapi ya Yandi mpe me sonika “ya kulemvuka” na zulu ya buku ya munu; me losa yawu na manima ya Yandi, na Mubu ya Kuzimbana. Mu me tala yawu mwa fyoti. Mpe Yandi me tuba, “Ntangu yayi, Mu me lemvokila nge, kasi nge zola kufundisa yandi.” Beno me mona? Yandi me tuba, “Ba me lemvokila nge, kasi wapi mutindu samu na yandi? Nge zola kupasula yandi. Nge me zola yandi ve kuzinga.”

191 Mu banzaka, “O Nzambi, lemvokila munu. Mu banzaka na yawu ve. Mu vwanda zola ve kusala yawu. Mu—mu—mu vwanda zola ve kusala yawu.”

192 “Ba me lemvokila nge. Nge ke kuwa mbote. Kasi wapi mutindu samu na yandi? Yandi ke na nsatu ya yawu, mpe. Yandi ke na nsatu ya yawu.”

193 “Mbote,” mu banzaka, “Nzambi, wapi mutindu mu ke zaba nani Nge me bokila, mpe nani Nge me bokila ve?” Ya kele kisalu ya munu na kuzonza na muntu nyonso.

194 Na yawu, ntangu vision katukilaka munu, mu me belama na yandi. Mu me tuba, “Wafaso, mama?” mpe babakala zole yina kwendaka na wese. Mpe bawu . . . Yandi vwandaka ya kuvwanda kuna, vwanda tutana, beno zaba, na kusekaka. Mbwata ya whisky vwandaka na zulu ya mesa, to ya byele, ya vwandaka, ya alcool vwandaka kuna, yina bawu vwandaka kunwa. Mu me belama. Mu me tuba, “Wapi faso?”

Mpe yandi me tuba, “Oh, mbote.”

Mpe mu me tuba, “Mu lenda vwanda?”

Yandi me tuba, “Oh, mu kele na bantu.”

Mu me tuba, “Mu me banza ve na mutindu yina, mpangi ya kento.”

Yandi me tala munu na yina mu me bokila yandi “mpangi ya kento.” Yandi me tuba, “Yinki nge zola?”

Mu me tuba, “Mu lenda vwanda kaka minuti?”

Yandi me tuba, “Mutindu nge zola.” Mpe mu me vwanda.

Mu me tuba na yandi yina kusalamaka. Yandi me tuba, “Nkumbu ya nge nani?”

Mpe mu me tuba, “Branham.”

Yandi me tuba, “Nge kele muntu yina kele awa na stade?”

Mu tubaka, “Yinga, mama.”

195 Yandi me tuba, “Mu vwanda sosa kukwiza kuna.” Yandi me tuba, “Tata Branham, mu me kula na dibuta ya Miklisto.” Yandi me tuba, “Mu kele na bantwenya zole ya bakento yina kele Miklisto. Kasi mwa, mwa mambu kusalamaka,” mpe yandi bakaka nzila ya yimbi, to me benda.

196 Mu me tuba, “Kasi, mpangi ya kento, mu ke kipe ve, Menga ke na kuzungila dyaka nge. Yinza yayi kele ya kufuka na Menga.” Kana Yawu ve, Nzambi zolaka kufwa beto, mosi na mosi ya beto. Yandi. . . Ntangu ba ke katula Menga yango, beno tala lusambusu. Kasi ntangu yayi, kana beno kufwa kukondwa Menga yango, beno ke kwenda na lweka yankaka ya kisika yango, kuna ya kele ve na kima mosi ya kusala samu na beno. Bubuyi Menga ke na kusala na kisika ya beno. Mu me tuba, “Mama, kieleka, Menga kele dyaka ya kufika nge. Ntangu nyonso yina nge ke na pema na nzutu ya nge, Menga ke fika nge. Kasi kilumbu ntangu pema ke katuka awa, moyo me basika, nge ke kwenda na lweka yankaka ya Menga yango, mpe ya kele na kima ve kasi lusambusu. Na yina beno kele na siansi ya lemvo. . .” Mpe mu me baka yandi na diboko.

197 Yandi vwandaka dila, vwandaka tuba, “Tata Branham, mu ke na kunwaka malafu.”

198 Mu me tuba, “Yina ke sala dyambu ve. Kima, me kebisa munu na kwiza tuba na nge.” Mu me tuba, “Nzambi, ntete mbandukulu ya yinza, bokilaka nge, mpangi ya kento. Mpe nge ke na kusalaka yimbi, mpe nge ke na kukumisa yawu kaka yimbi mingi.”

199 Yandi me tuba, “Nge banza ti Yandi ke zola kuzwa munu?”

200 Mu me tuba, “Kieleka, Yandi ke kuzwa nge.”

201 Kuna yandi me fukama, beto me fukama na kati-kati ya kivinga, mpe lukutakanu ya bisambu ya ntangu ya ntama. Pulusu yina me katula yimpu ya yandi mpe me futika dikulu mosi. Kuna beto kuzwaka lukutakanu ya bisambu, na kisika yina. Samu na yinki? Nzambi kele mfumu ya nene.

“Na kubikaka na lweka bisalu yayi ya kufwa, ti beto kwenda na ya kulunga.”

202 Beto kota na kisika yayi kisika, “Mu kele ya dibuundu; mu kele ya *yina*,” nyonso yina me manisa. Mpe ti beto kwenda na ya kulunga.

<sup>203</sup> Nkundi ya munu musumuki, kana beno kele kukondwa Menga bubu yayi, kukondwa mpulusu, kukondwa lemvo, Menga ya Yesu Klisto ke bumba beno. Beno ke tuba, “Mbote, mu ke lendaka kukima ntangu nyonso yayi.” Kasi kilumbu mosi beno ke kwenda kisika ya kele na kima mosi ve yina lenda sala samu na beno kuna.

Beto sambila ntangu yayi, na yina beto ke kulumusa bayintu ya beto.

<sup>204</sup> Ya kele, na mosi awa, yina zola bubu yayi kutuba, “Nzambi tala munu kyadi, mu me bakula ti mu me sala yimbi”? Ya lenda vwanda ti beno me kuma ya dibuundu. Ya kele mbote mingi. Kasi kana beno me kuzwaka ve lemvo ya Klisto, beno zola kutelemisa diboko ya beno, kutuba, “Sambila samu, na munu, Mpangi Branham”? Nzambi sakumuna nge, tata. Nzambi sakumuna nge, mama. Ya kele mbote. Ve. . . Nzambi sakumuna nge, tata, na manima kuna. Nzambi sakumuna nge, mpe nge. Kuna na manima, yinga, Nzambi kusakumuna nge. Telemisa diboko ya nge. Ya kele kieleka. Beno telemisa kaka diboko ya beno, mpe beno tuba, “Nzambi, lemvokila munu.”

<sup>205</sup> Beno ke tuba, “Mu kele ya dibuundu, Mpangi Branham. Yinga, mu—mu me meka na kuvwanda mbote, kasi mu zaba ve, mu ke mona kaka, ke tala mutindu, mu lenda sala yawu ve.” Oh, kizyeti ya mawa, nkundi ya munu ya mawa ya kulemba, nge me monaka ntete ve vision.

<sup>206</sup> Beno ke tuba, “Mpangi Branham, Mu bokaka. Mu zonzaka na bandinga. Mu salaka nyonso yayi.” Ya lendaka vwanda kieleka, mpe. Ya kele nyonso ya kulunga, kima mosi ve ya kutuba na ntuala ya yawu.

Kasi, nkundi ya munu, ya kuzimbana, kasi, kutuba na bandinga, to kutekita, to kupesana maboko, to kuzwa mbotika, yina, nyonso yina kele ya kulunga. Kasi, kuzaba Yandi, kele kuzaba Muntu. “Kuzaba Yandi kele Luzingu.”

<sup>207</sup> Beno ke tuba, “Mu zaba Biblia, kieleka mbote.” Mbote, kuzaba Biblia, kele ve Luzingu. “Kuzaba Yandi,” kiyingilu ya muntu, “kuzaba Yandi, Klisto,” ti beno ke zaba ti Yandi me lemvokila beno.

Beno zola kaka kutelemisa maboko ya beno, dyaka, muntu yankaka? Nzambi sakumuna nge, mama. Nzambi sakumuna nge, tata. Nzambi sakumuna nge awa, mpangi ya bakala. Nzambi sakumuna nge kuna na manima, ntwenya ya bakala. Nzambi sakumuna nge awa, mpangi ya kento. Nzambi sakumuna nge, kuna, na manima. Ya kele kieleka. “Kuzaba Yandi, kele Luzingu.”

“Mpangi Branham, bambuka munu moyo. Mu kele ntangu yayi, kaka awa na kiti ya munu, ke ndima Klisto.”

208 Beno tuba, “Kwiza na kati ya ntima ya munu, Mfumu Yesu, mpe pesa munu ngemba yango, lembami yango.” Kukwenda na dibuundu, kubula muziki na ngolo mutindu beno lenda, kubina na zulu mpe na yisi, kukima na kati-kati ya bakiti; kukwenda na yinzo, kutita, mpe kuningana, mpe kusala bamambu, ya kele Klisto ve. Beno ke kwenda na dibuundu, ke vwanda mpe ke kuwa mwa dilongi mosi na yina me tala mutindu ba ke lenga kyamvu, to *kima mosi na yankaka* mutindu yina, kuwa ata fyoti ve Ndinga. Ndinga ke nataka Luzingu. Ya kele Nkuna. Beno zola ve ngemba?

209 Beno ke na kukitungisa na lufwa? Kana beno kuzwa mpasi ya ntima bubu yayi, ya ke pesa beno boma? To beno ke sepela, na kutuba, “Mu ke kwenda vwanda na Mfumu Yesu na nsuka ya nzila yayi?” Beno zaba Yandi? Kana ve, beno telemisa kaka diboko ya beno. Beto ke sambila samu na beno. Yinga, mpangi-bakala, nge, mpe.

210 Mbote mingi, na ntima ya beno ntangu yayi.

Kaka mutindu mu kele, na kima mosi ve,  
Kasi Menga ya Yandi yina basikaka (samu na  
nani?) samu na munu,  
Samu ti mu silaka, mu ke kwikila,  
O Mwana-dimeme, O Mwana-dimeme ya  
Nzambi, mu me kwiza. Mu me kwiza, na  
lembami, na mawa.  
Kaka mutindu . . .

Beno belama kaka na Yandi, na nzila ya lukwikilu. Beno kwikila ti Yandi kele ya kutelama kaka kuna na lweka ya beno. Yandi kele.

. . .-ndwa  
Kukatula moyo ya munu (na bima yikwa  
ntangu yayi?) ya mosi . . . (nganzi, yimbi),  
Na Menga ya Yandi Yina lenda sukula konso  
ditona,  
O Mwana-dimeme . . .

211 “Na nzila ya lukwikilu mu ke tambula na kulunsi, na suka yayi. Mu ke bika bizitu ya munu na yisi. Mu me kwiza.” Nzambi kusakumuna beno kuna na manima. Ya kele mbote. [Mpangi Branham me banda na kuyimba na kati ya yinwa *Kaka Mutindu Mu Kele—Mu.*] Beno vwanda ve mutindu yankaka ntangu yayi. Na tiya, na lembami, beno belama mbala mosi na kulunsi.

212 Na Ngwisani ya Ntama, ba vwanda nata mwana-dimeme. Bawu vwanda zaba ti bawu vwandaka me sumuka, bawu zabaka yawu landila misiku. Beno zaba yawu ntangu yayi, samu ti Nzambi me zonza na ntima ya beno. Bawu talaka na misiku, “Nge ke sala ve kinsuza. Nge ke sala ve *yayi-mpe-yayi.*” Mpe bawu vwandaka baka mwana-dimeme, vwandaka kwenda mpe vwandaka tula maboko ya bawu na zulu ya mwana-

dimeme, nganza-Nzambi vwandaka zenga laka. Mwa kibulu yango vwandaka pupa, mpe vwandaka basisa menga, mpe vwandaka boka, mpe vwanda kufwa. Maboko ya yandi nyonso vwanda fuluka na menga. Mwana-dimeme vwanda kufwa na kisika ya yandi, kasi yandi vwandaka basika na nsatu mosi ya kusala yawu dyaka.

<sup>213</sup> Kasi na kisika yayi, beto ke kwiza na nzila ya lukwikilu, na nzila ya lemvo. Nzambi bokilaka beto. Beto ke tula maboko ya beto na zulu ya yintu ya Mwana-dimeme ya Nzambi. Beto ke na kuwa makelele ya kikonko. Beto ke kuwa Ndinga yina, “Mu ke na mpwila; pesa Munu ya kunwa. Tata, kutula ve disumu yayi na zulu ya bawu; bawu zaba ve yinki bawu ke na kusalaka.” Beno me mona? Na nzila ya lukwikilu, beto ke kuwa lufwa ya Yandi kuna na kisika ya beto. Kuna na yisi ya ntima ya beto ke kwiza vwanda ngemba, na mudindu, ntangu Ndinga ke tuba, “Ba me lemvokila nge. Kwenda mpe sumuka dyaka ve.” Wapi mutindu, na nzila ya lemvo, kuna, beto ke kwenda ve na nsatu mosi, kasi nsatu ata mbala mosi ve ya kusumuka to kusala kima mosi ya yimbi. Ngemba nyonso yina me luta kubakula nyonso, me kota ntima ya beto.

Ti beto kuzwa Yawu ntangu yayi na yina beto ke sambila, beto nyonso, kintwadi.

<sup>214</sup> Tata ya Mazulu, ba ke na kwiza na nzila ya lukwikilu, na nzila ya lemvo. Ya kele pene ya maboko kumi na zole yina me telama. Ya kele bambuma ya Nsangu. Bawu me kwiza na Nge. Bawu ke kwikila. Mu ke kwikila na bawu, mpe, Mfumu. Mu ke kwikila ti, kieleka, Mpeve-Santu me tubila bawu. Mpe na nzila ya lukwikilu ba ke na kukwiza mbala mosi na zulu ya kikalu ya Jacob ntangu yayi, tii na dikulu ya kulinsi, kuna bawu me tula masumu ya bawu, mpe ke na kutuba, “Mfumu, ya kele mingi samu na munu. Mu lenda dyaka kaka ve kunata yawu. Mpe Nge zola kukatula munu kizitu ya munu ya disumu, mpe kukatula nsatu yango na ntima ya munu na kusala yawu? Mpe ti munu, na nzila ya lukwikilu, kilumbu yayi, kuzwa Nge mutindu Mvulusu ya munu mosi. Mpe katuka ntangu yayi, mu ke landa Nge konso kilometele ya nzila, tii nsuka ya nzyetolo. Mu ke na kumona yina zola kutuba ‘kukwenda na ya kulunga,’ ve kukota na dibuundu, mpe misisa ya bisalu ya kufwa mutindu bambotika mpe nyonso yankaka yina. Kasi mu zola kukwenda na ntwala, tii ntangu mu ke vwanda dyaka ve, mpe Klisto lenda zinga na kati ya munu.”

<sup>215</sup> O Yesu, pesa yayi na moyo nyonso yina ke na kufungula masumu, na suka yayi. Bantu nyonso yina me telemisa maboko ya bawu ke kuzwa Luzingu ya Seko samu ti Nge silaka yawu. Bawu me ndima na ntwala ya bantu. Bawu me telemisa maboko ya bawu. Bawu me telemisa misiku nyonso ya ngolo ya kubenda. Bawu me sala science kuwa nsoni ya yandi mosi, samu ti science ke tuba, “Maboko ya beno fwana kubwa.” Nyonso ke lakisa yawu na science, ti ya fwana vwanda ya kukangama na ntoto, samu



ti ngolo ya kubenda ke kanga yawu na yisi. Kasi ya vwandaka na mpeve na kati ya bawu yina bakaka lukanu, mpe bawu me telemisa misiku ya ngolo ya kubenda mpe me telemisa maboko ya bawu. Nge me mona yawu, Mfumu. Nge me tula nkumbu ya bawu na Buku. “Ya kulemvuka.” Buku ya ntama me vutuka ntangu yayi na Mubu ya Kuzimbana, ba ke bambuka dyaka ve moyo na yawu. Ti bawu kwenda na ntwala bubu yayi, mutindu Miklisto ya luzolo, ya lembami, samu na kusadila Nge. Mpe ya lendaka vwanda na mingi yina telemisaka ve diboko ya bawu, pesa mpe na bawu.

<sup>216</sup> Ti kutambula ya basantu vwanda kaka ya kukangama fyoti, Mfumu, samu ti beto kele kilumbu mosi pene na Yinzo kulutila na yina beto vwandaka mazono. Vwanda na beto, Mfumu, samu ti beto me lomba yawu na Nkumbu ya Klisto mpe samu na nkembo ya Yandi. Amen.



*HEBREUX, KAPU YA TANU MPE YA SAMBANU 1* KNG57-0908M

(Hebrews, Chapter Five And Six <sup>1</sup>)

BANDANDANI YA BUKU YA BA-HEBREUX

Nsangu yayi ya Mpangi William Marrion Branham, kulongamaka na Kingelesi, Na Lumingu na suka, na kilumbu ya 8 ya Ngonda ya yivwa, na mvula 1957, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)